

Hebreos

1 ¹PanopɁ Cohăcĵŭ ijiahye. Tiquiro peye tahari mari acayere panopɁ cĵenare tiquiro yere yahuahye. Apequinare tiquiro bajuaro yahuahye. Apequinare quehēnopɁ yahuahye. Apequinare tiquiro piti caro yahuahye. Tiquiro yere yahu mŭhtariquinare yahu dutiro, sa yahuahye tiquiro mari acayere. ²YojopɁre pihtiri deco panogă ijiye decorire tiquiro macɁnore tiquiro yere yahu dutigŭ tiquiro pehe marine yahue tiri. Tiquiro PacɁro ye dutiro mehna ahri yehpare, ũhmŭse gŭhŭre yeriquiro ijire. Tiquiro PacɁro pehe pihtiri deco ijigŭ ijipihtiyere cŭoatiquirore cŭahye tiquiro macɁnore. ³Sa yero tiquiro macɁno pehe tiquiro PacɁro ye asi siteyere cŭoriquiro ijiro, tiquiro tutuayere marine ihŭnore. Sa yero ihcăno saha tiquiro PacɁro yero sahata ijiro, tiquiro PacɁro ijiye tiyere marine ihŭnore tiquiro macɁno. Sa yero tiquiro macɁno tiquiro tutuaye mehna dutigŭ ahri yehpa, ũhmŭse gŭhŭ sa ijiducure. Sa yero mari ņano yerire tiquiro coseri bato ũhmŭsepɁ tiquiro PacɁro tutua yŭhdŭariquiro poto pehe dujiahye, pŭhtoro tiquiro ijiyere ihŭono.

Cohăcĵŭ macɁno angele yŭhdŭoro ijire

⁴Tiquiro “Cohăcĵŭ macɁno”, wame tire. Tŭ wamene Cohăcĵŭ cŭahye tiquirore. Sa wame tiro apequina pŭhtoro ijire. Sa yero tiquiro angele yŭhdŭoro ijire.

⁵Tiquiro yequina angele pehere Cohăcĵŭ ne ohŭ saha ni yahuera tiahye:

Yŭhŭ macɁ ijire mŭhŭ. Miare mŭhure bajuagŭ yei, niahye Cohăcĵŭ tiquiro macɁnore.

Angele pehere ne sa ni yahuera tiahye. Sa yero tiquinare ahri gŭhŭre ne yahuera tiahye:

Tiquiro PacɁro ijiiitja yŭhŭ. Sa yero tiquiro yŭhŭ macɁ ijirota, niahye Cohăcĵŭ tiquiro macɁnore.

Angele pehere ne sa ni yahuera tiahye. Sa yero tiquiro macɁno tiquina yŭhdŭoro ijire. ⁶Sa yero ape taha tiquiro macɁnore coă masa bajuariquirore ahri yehpapɁ cŭno ohŭ saha niahye Cohăcĵŭ tiquirore:

Ijipihtiyequina yeequina angele dŭsepe curi mehna quehe sa, ņo peoeta tiquina yŭhŭ macɁre, niahye tiquiro.

⁷Sa yero tiquiro yequina angele pehere yahuro taro ohŭ saha niahye tiquiro:

Yeequina angelere wihnono yero saha pagu tigü yeaja yuhu. Tiquina yuhu cahacjēna ijire. Sa yegu tiquinare peca pohna yero saha pagu tigü yeaja yuhu, ni yahuahye Cohācjū.

⁸Tiquinare sa nieperota tiquiro macuno pehere ohō saha niahye:

Muhu Cohācjū ijipihtiyequina pūhto sa ijiducugūta. Queoro dutiguta mūhu, mūhu yequinare. ⁹Ni mehono marieno yeyere, quehnoano yeyere tutuaro cahmene mūhu. Sa yegu ñañe yeyere ihña yabire mūhu. Muhu sa ijigū ihñagu yuhu mūhu Pacu ijipihtiyequina arequina yūhdūoro mūhure bucuegū yei, niahye Cohācjū mari Pacu.

¹⁰Ahri gūhure niahye tiquiro, tiquiro macunore “Pūhto” ni pisuro:

Pūhto, coā waropure ahri yehpare, ūhmuse gūhure bajumehnedi mūhu. ¹¹Ti ijipihtiye camesa pihtia waharota. Mūhu pehe ne camesasi. Sa ijiducugūta mūhu. Ti ijipihtiye suhtiro ahba bora dijiaro saha pihtia waharota. ¹²Ti ijipihtiye ūhmūse, ahri yehpa gūhure camesagū yeita mūhu. Mūnana suhtirore mūhu cohāboro saha ti ijipihtiyere camesagū yeita mūhu. Sa yero suhtiro ahba bora dijiaro saha ti ijipihtiye camesarota. Mūhu pehe ne camesasi. Sa ijiducugūta mūhu, niahye Cohācjū tiquiro macunore.

¹³Ne angele pehere ahrire yahuera tiahye mari Pacu:

Yuhu poto pehe dujiya mūhu. Pūhto ijire mūhu. Sa yegu mūhure ihña tuhtiyequinare yūhdūdūca basagūta. Sa yegu tiquina pūhto ijigūta mūhu, niahye Cohācjū tiquiro macunore.

¹⁴Ijipihtiyequina angele pehe Cohācjū cahacjēna ijire. Sa yero mari Pacu ohore tiquiro yequina angelere Cristo yūhdūoatiquinare yedoho dutiro.

Cohācjū yere quehnoañe buheyere marine sa tūhotu cāhno cahmedare

2 ¹Sa yena Cohācjū macuno waro marine yahuriquiro tiquiro ijigū masina tiquiro yahuyere mari tūhorire quehnoano wacūno cahmene marine, “Tire boari”, nina. ²⁻³Angele yahurire masa pehe yūhdūdūcagū ihñano Cohācjū tiquinare buhiri dahreahye. Sa buhiri dahrero angele tiquina yahuri poto ijigū ihñono niahye. Sa yena angele yahuri poto ijigū masina, tire marine yūhtiro cahmene. Ti yūhdūoro Cristo pehere yūhtiro cahmene. Tiquiro mari pūhtoro marine tiquiro yūhdūoatire yahu mūhtahye. Sa ye tiquirore tūhoriquina pehe tiquiro yahurire marine yahu turiari, marine quehnoano masigū yee tehe. Sa yero ti buheyere marine tiquiro yūhdūoati buheyere mari sa tūhotu cāgū Cohācjū marine buhiri dahrerota. Tire duhti masiedaja mari.

⁴Ti buheyere tūho mūhtariquina tiquina buheri watoa Cohācjū pehe ti buheye poto ijigū ihñono nidi. Tiquiro tutuaye mehna ihñono nidi. Sa yero peye tahari tiquiro tutuaye mehna ye ihñono ti buheyere poto ijigū ihñono nidi. Sa yero tiquiro yequinare tiquina ye masiatire tiquiro cahmeno sahata cūahye. Espiritu Santo pehe ijire marine ye masigū yeriquiro.

Jesucristo mari yero sahata pagu tiriquireo masa bajuahye

⁵Pihtiri deco bato ijyequina Cohäcjä caha ijyequina puhto a jisi angele pehe. Tiquinare puhto sösi mari Pacu. ⁶Sa yero ihcäquireo mari Pacure tiquiro yahuducurire ohö saha ni ojoahye panopu:

Masa ihyo ijyequina tiquina ijepegüta tiquinare wacüre mühu.

Masare quehnoano yere mühu. ⁷Meheñe decorigä angele docapu masare cüahye mühu. Sa cüepegüta yojopure tiquinare tutuayere ohogu, puhto söahye mühu. ⁸Mühu sa sögü ahri yehparü ijyequina wahiquina gühu bui dühsaro marieno masare cüahye mühu, niahye panopu cjüno mari Pacure.

Sa söno ahri yehparü ijyequina wahiquina gühu bui dühsaro marieno masare cüahye. Masare tiquiro sa puhto söepögüta ijipihyequina ahri yehparü ijyequina wahiquina masare ihña wahädariäga, üsä tühotügü. Ahri yehparü ijyequina wahiquinare ihña wahägü yeraniaga masa. Ijipihye bui ijeraniaga masa. ⁹Sa tiquinare ihña wahägü yerapenata Jesu pehere wacü tutuaja mari. Meheñe decorigä angele docapu mari Pacu tiquiro macüno gühüre cüahye, mari ñañe buhiri yariatiquirore. Mari Pacu marine cahño mari yariaborirore Jesure yariagü cahmeahye. Sa yero tiquiro sa yariagü ihñano tiquirore tutuayere ohoro, puhtoro söahye tiquirore.

¹⁰Cohäcjä ijipihyere bajumehnediquiro ijire. Sa ye ijipihye tiquiro ye dihita ijire. Sa yero Jesure yaria dutiro ñañene cohägü yeahye tiquirore. Sa yeahye tiquiro masa peyequina tiquiro yequina ijiatiquinare ühmüserü neano taro. Jesu sa yero, ñañe marieniquiro, quehnoa yühduariquiro tiquiro ijyere ihñono niahye. Sa yero Jesu pehe marine yühduoriquiro, mari puhtorota ijire. ¹¹Ijipihyequina masare tiquina ñañe yerire cose were tiquiro. Sa yero Jesu mari tiquiro cose wenohrina mehna Pacu tire Cohäcjäre. Mari Pacu ihcäquirota ijire. Mari Pacu tiquiro ijigü Jesu marine tiquiro yequinare tiquiro cose wenohrinare “Yühu acaye ijire”, ni pisuro ne bæ tierare. Tiquiro sa ni pisurire müsare yahutja. ¹²Ohö saha nino niahye tiquiro:

Cohäcjä, mühu ijye tiyere yahutja yühu acayepüre. Ijipihyequina yeequina ihñonopu mühüre ño peogu “Tutuariquireo ijire”, ni yahutja yühu tiquinare, niahye tiquiro Pacurore.

¹³Ahri gühüre niahye tiquiro:

Cohäcjäre wacü tutuautja yühu, niahye tiquiro.

Ahri gühüre niahye tiquiro:

Ohö ijiaja yühu. Cohäcjä pohne mehna ohö ijiaja. Yühüre tiquiro cüriquina yühu acaye mehna ohö ijiaja, niahye tiquiro yequinare “Yühu acaye” ni pisuro.

¹⁴“Tiquiro pohne” tiquiro niñequina pagu tiyequina mari ijigü ihñano, Jesu pehe mari ya pagu saha pagu tiriquireo ahtahye. Sa ijiriquiro ahtahye tiquiro curusapu yariaro taro, watñore butigü yero taro. Tiquiro watño pehe yaria

duririquiro ijire. ¹⁵Sa ye watĩnore butigũ yero, marine yũhdũore. Mari pehe decoripe mari yariatire cuemi. Sa cuerina ijina pecapũ wahaborina ijimi mari. Sa ijina mari ijigũ ihñano tiquiro marine yũhdũore. ¹⁶Sa yũhdũoro angele pehere yedohoro ahtaerahye tiquiro. Abrahã panamena iji turianare Cohãcjũ yequinare mari pehere yedohoro ahtahye. ¹⁷Sa yero tiquiro mari acayũro warota ahtahye. Ihcãno saha mari yero saha pagũ tiriquiro ahtahye. Sa ahtaro mari yũhdũatire mari ñañe yerire mari Pacũre cohã dutiro ahtaro niahye. Sa yero mari yequina pahia pũhtoa tiquina yeriro saha yero ahtaro niahye. Mari yero saha ijiro marine quehnoano paja ihñare. Sa yero Cohãcjũ cahmeno saha sa yeducuriquiro ijire. Sa yero tiquiro mari yaquiro pahia pũhgoro ijiro nine. ¹⁸Tiquiro ñano yũhdũahye. Sa yero watĩno tiquirore ñano ye dutimahye. Yerahye tiquiro. Sa ñañene yerariquiro ijiro, tiquiro pehe mari gũhũre ñañene yeragũ ye masine. Watĩno ñañene tiquiro ye dutigũ ihñano marine ñañene yeragũ ye masine Jesu.

Jesu Moise yũhdũoro ijiriquiro ijire

3 ¹Jesu tiquiro sa ijiriquiro ijigũ ihñana tiquirore quehnoano wacũña mũsa. Yũhũ acaye Jesu yequina, Cohãcjũ besenohrina ijire mũsa. Tiquiro Jesu pehe Cohãcjũ cũriquiru ijiro mari yaquiro pahia pũhgoro ijire. Tiquiro ye buheyere quehnoañe buheyere mari quehnoano ño peoaja. Tiquiro pehere quehnoano wacũña mũsa. ²Cohãcjũ tiquirore marine yũhdũoatiquirore tiquiro cũgũ tiquiro pehe Cohãcjũ cũriro saha yeahye. Ne yũhdũducaerahye. Moise gũhũ Cohãcjũ yequina Israe masare yedohoro ne yũhdũducaerahye. Sata yeahye Jesu gũhũ.

³Sa yero Moiseru tiquina ño peoriro yũhdũoro Jesu pehere ño peoro cahmene marine. Ohõ saha ijire ti mari queoye mehna buhegũ. Wũhũre mari ño peoriro yũhdũoro wũhũ dahreriquiro pehere ño peoro cahmene marine. Sa yero Jesu pehe wũhũ dahreriquiro yero saha ijiriquiro tiquiro ijigũ Moiseru mari ño peoriro yũhdũoro tiquiro pehere ño peoro cahmene marine. ⁴⁻⁶Ohõ saha ijire ti. Mari Cristo yequina Cohãcjũ ya curua cjãna ijiaja. Cristo pehe wũhũre tiquiro cũboriro saha marine tiquiro ya curua cjãna ijiatinare cũno nine. Masa pehe wũhũse yeyequina ijire. Cohãcjũ pehe ijipihtiyere yeriquiro ijire. Moise pehe Cohãcjũ ya curua cjẽnare yedohoducuriquiro ijiro, camerũ Cohãcjũ yahuatire yahue tiahye masare. Cristo pehe Cohãcjũ macũno ijiro, Cohãcjũ yere yeducuriquiro ijiro, Cohãcjũ ya curua cjẽna pũhgoro ijire. Sa ijiriquiro ijigũ ihñana Moiseru mari ño peoriro yũhdũoro Cristo pehere ño peoro cahmene marine. Sa yena mari pehe Cristore wacũ tutua duhuerana, marine tiquiro yũhdũoatire sa bucueducuna, tiquiro ya curua cjãna ijiaja mari.

Cohãcjũ tiquiro yequinare tiquiro mehna quehnoano sogũ cahmene

⁷Sa yena Cristore mari wacũ tutua duhueratire ohõ saha yero cahmene marine. Ohõ saha nine Espĩritu Santo:

Miare yũhũ, Cohãcjũ, mũsare yũhũ yahugũ, yũhti dueyequina yero saha ijieracãhña. ⁸Quehnoano yũhtiya mũsa yũhũre. Panopũ Israe masa masa

marienopu ijiye, sa yuhducari yuhure. Sa ye yuhure ne bucuerağũ yeri tiquina. Sa yena tiquina yero saha yeracãhña mûsa yuhure. ⁹Torure cuarenta cãhmari waro tiquinare yuhũ tutuaye mehna ye ihñomi. Yuhũ sa ye ihñopeğũta tiquina pehe ohõ saha ni tãhotue timedi: “¿Ñañene mari yegũ ihñano Cohãcjũ marine buhiri dahreboagari?” ni tãhotue timedi. Sa ni tãhotuye ñano ye tuhue tiri. ¹⁰Tiquina sa yegũ ihñagũ tiquina mehna usuau. Sa usuagũ ohõ saha nii: “Tiquina yuhũ yahuducuyere tãho dueraye, sijoro saha ijiye buheyere sa wacũducuye nine. Yee pehere ne yũhti duerare”, nii tiquinare. ¹¹Sa yegũ tiquina mehna usuagũ ohõ saha ni yahuu: “Tiquina yuhũ mehna cjenã ne ijisi. Sa ye wape tiro marieno ijisi tiquina’, ni yahuu yuhũ”, ni yahuahye Cohãcjũ, niahye Espĩritu Santo pehe.

¹²Sa yena yuhũ acaye, quehnoano yeya mûsa, “Cohãcjũre cohãri”, nina. Mûsa ñañene tãhotuna, Cohãcjũre catiriquire wacũ tutuerana, tiquire cohãboaga mûsa. Ne ihcãquiuro mûsa mehna cjenõ sa yeracãhdo. ¹³Sa yena ahri pehere yero cahmene: Mûsa mehna cjenare decoripe Cohãcjũ yere mûsa basĩ cahme yahuducuya “Ñañene yeari”, nina. Ñañene yena, “Ti mehna bucueraja”, nina ni mehoñene tãhotuna niãa mari. Sa ni tãhotueracãhña. Ñañene yeducuna Cohãcjũ ye pehere cahmedaja mari. Sa yena ñañene duhu dueraja. “Sa yeari”, nina, mûsa mehna cjenare Cohãcjũ yere mûsa basĩ cahme yahuducuya. Cristo tiquire ahtato pano decoripe tire sa cahme yahuducuya. ¹⁴Sa yena coã waropũ Cristore mari wacũ tutua ðucariro saha mari wacũ tutuaducuna, mari catiro puno tiquire yere duherana, tiquire mehna cjenã ijiaja.

¹⁵Ohõ saha nine Cohãcjũ yere tiquina ojoari pũpũ:

Miare yuhũ Cohãcjũ mûsare yuhũ dutigũ quehnoano yũhtiya mûsa yuhure. Panopũ cjenã Israe masa yuhũ yahuepegũta ño peo dueraye, yuhure yũhti duerari. Sa yena tiquina yero saha yeracãhña mûsa, niahye Cohãcjũ, ni ojoahye panopũre.

¹⁶Sa ye Cohãcjũ tiquire yahurire tãhomediquina ijiepetã tiquina tiquire yũhtierahye. Tiquina ijipihtiequina Egiptopũ ijiequina Cohãcjũ wioriquina ijiepetã tiquire ne yũhtierahye. ¹⁷Sa ñano yeye cuarenta cãhmari waro Cohãcjũre usuagũ yee tiahye. Tiquina sa yeri buhiri masa marienopũ yariahye tiquina. ¹⁸Tiquire tiquina sa yũhti dueragũ ihñano ohõ saha cua pesaro mehna niahye tiquire: “Tiquina yuhũ mehna cjenã ne ijisi. Sa ye wape tiro marieno ne ijisi tiquina”, niahye tiquire. ¹⁹Tiquire sa nigũ tãhona ahri pehere masinata mari: Cohãcjũre tiquina wacũ tutuerari buhiri tiquire mehna cjenã iji masiedahye. Sa ye tiquire mehna quehnoano so, iji masiedahye.

4 ¹Sa yero panopũ cjenare tiquire mehna tiquina quehnoano soatire cahmeno, tiquinare “Yuhũ mehna wape tiro marieno sonata”, ni cũahye Cohãcjũ. Mari gũhure sata ni cũahye tiquire. Sa yena cua pesaro mehna Cohãcjũre quehnoano yũhtihna mari, “Wihearĩ”, nina. Sa wihena tiquire mehna quehnoano sosi mari. ²Panopũ cjenã Cohãcjũ yere tiquina tãhoriro saha mari gũhũ quehnoañe buheyere tãhou. Tiquina tãho mũhtariquina pehe tãhoye,

“Cohācjū ye waro ijire”, ni tūhotuerahye. Sa ye tiquina tūhori dūhseati ijierahye. ³Mari pehe tiquiore wacū tutuana Cohācjū mehna cjāna ijinata. Sa yena tiquiore mehna quehnoano iji, sonata. Wape tiro marieno ijinata. Cohācjū tiquiore nidiro sahata ijire ti. Ohō saha niahye tiquiore yūhtierariquinare:

Tiquina mehna usuagu cua pesaro mehna ohō saha ni yahuu:

“Tiquina yūhū mehna cjēna ne ijisi. Sa ye wape tiro marieno ne ijisi”, ni yahuu, niahye Cohācjū yere tiquina ojoari pūpū.

Ahri yehpare tiquiore yeri bato dahra duhurīahye tiquiore. ⁴Ahrire mari masiaja. Seis decori ahri yehpare tiquiore yeri bato tiquiore dahra duhurire yahuro ohō saha niahye Cohācjū ye yahuducuyere tiquina ojoari pūpū:

Seis decori bato ijipihiyere tiquiore dahrarire pehoro, Cohācjū dahra duhuahye, niahye tiquiore yere tiquina ojoari pūpū.

⁵Sa yero Cohācjū yere tiquina ojoari pūpū ohō saha ni yahure tiquiore mehna quehnoano ijieyequinare:

“Tiquina yūhū mehna cjēna ne ijisi. Sa ye wape tiro marieno ne ijisi”, niahye Cohācjū, nine tiquiore yere tiquina ojoari pūpū.

⁶Sa ye quehnoañe buheyere tūho mūhtariquina tiquiore tiquina yūhdūdcari buhiri tiquiore mehna cjēna ijisi tiquina. Sa ye tiquiore mehna wape tiro marieno ijisi tiquina. Apequina pehe tiquiore mehna cjēna ijietā. Sa ye tiquiore mehna wape tiro marieno soyequina ijietā. ⁷Sa yero masare tiquiore yūhdūoati deco ihcā deco cūahye pari turi Cohācjū. Ti decota yojopūre ijire. Peye cūhmari bato Israe masa Cohācjūre tiquina tūho mūhtari bato ti decore yahuahye Davi pehe. Cohācjū tiquiore yahu dutigū yahuahye. Cohācjū ye yahuducuye tiquina ojoarire mūzare yūhū yahuri decore ohō saha ni ojoahye Davi:

Ahri decore yūhū Cohācjū mūzare yūhū yahugū yūhdūdcaro marieno quehnoano yūhtiya mūsa yūhure, ni ojoahye panopūre.

⁸Coā waropūre Josué Israe masare Cohācjū ohori yehpapū ne sahye. “Yūhū mehna wape tiro marieno soyequina ijietā”, nino, ti yehpapū tiquina soatire nino niedahye Cohācjū. Ti yehpapū so dutiro, ape deco tiquiore yūhdūoati decore cūedaboaga tiquiore. ⁹Seis decori bato ahri yehpapūre tiquiore yeri bato Cohācjū tiquiore dahra duhuriro saha mari tiquiore yequina gūhū tiquiore mehna wape tiro marieno mari soati ijirota. Tiquiore mehna mari quehnoano ijietā ijirota. ¹⁰Sa yero Cohācjū tiquiore dahrarire duhu cārīahye. Sa yena mari gūhū mari wape tirire duhu cānata. ¹¹Sa yena mari tiquiore yequina quehnoano yeihna. Cohācjū yere quehnoano yūhtiuhna tiquiore mehna mari quehnoano soato saha. Panopū cjēna mari acaye tiquina yūhdūdcari bato Cohācjū mehna cjēna iji masiedahye tiquina. Tiquina yero saha yeracūhna mari.

¹²Cohācjū ye yahuducuye marine catigū yere. Quehnoañe pehere marine comesagū yere. Sa ye tiquiore ye yahuducuye ihyo ijieye ijierare. Sa ye ñoseni pī pūa peheri siori pī mehna dihirore tiquina yūhre ihñā tiquina masino saha tiquiore ye yahuducuye gūhū mari ijieye tiyere quehnoano masigū yere. Tiquiore ye yahuducuyere mari tūhogū, tire mari buhegū mari ijieye tiyere quehnoano masi

pehogũ yere marine. ¹³Ne Cohãcjũre mari ijiye tiyere mari yerire nũo masiedaja mari. Ijipihitiyere tiquiõo bajumehnedire, tiquiõo bajumehnediquina gãhũre ihñare tiquiõo. Sa yena mari yerire tiquiõore yahu yũhdũro cahmene marine.

Jesu tutuariquiõo mari yaquiõo pahia pũhtoro ijire

¹⁴Jesu Cohãcjũ macũno tiquiõo Pacũro cahapũ tojoariquiõo ijire. Tiquiõo tutuariquiõo mari yaquiõo pahia pũhtoro ijire. Sa yero marine Cohãcjũre sini basare. Tiquiõo sa ijiriquiõo ijigũ ihñana mari pehe tiquiõo yere quehnoano yũthiinha. Tiquiõore quehnoano wacũ tutuaducuhna. ¹⁵Tiquiõo mari yaquiõo pahi mari ñano yũhdũgũ ihñano quehnoano paja ihñariquiõo ijire. Mari ñañene tutuaro cahmeñene masine tiquiõo. Watĩno ijipihitiyere ñañene marine tiquiõo ye dutiriro sahata tiquiõo gãhũre ñañene ye dutimahye. Tiquiõo sa ye dutiepegũta tiquiõo ñañene yerahye. Sa ñañene tiquiõo ye dutinohriquiõo ijiro, marine paja ihñano tiquiõo yedoho masine marine. ¹⁶Sa yena cuero marieno Cohãcjũre siniinha. Tiquiõo marine cahĩne. Sa yero tiquiõore mari sinigũ tiquiõo pehe paja ihñano, marine yedohorota. Watĩno marine tiquiõo ñañene ye dutigũ, mari ñano yũhdũgũ gãhũre tiquiõo marine yedohorota.

5 ¹Ijipihitiyequinare pahia pũhtoare besero, masare besere Cohãcjũ. Sa tiquiõo beseri bato pahia pũhtoa pehe tiquina mehna cjẽnare yedohoye tehe Cohãcjũ cahacjẽna ijire. Sa ye ñañene tiquina yeri buhiri Cohãcjũre sini basare tiquina mehna cjẽnare. Wahiquiõore wejẽ ẽjũa mũoñe, Cohãcjũre sini basare. ²Pahia pũhtoa apequina masa yero saha quehnoano masi pehoeyequina ijire. Sa masieñequina ijiye, apequina masieñequinare yedoho masine. Sa ye quehnoano yerariquina gãhũre quehnoano yedoho masine. ³Sa ye pahia quehnoano ye pehoeyequina ijiye ñañe buhiri tiyequina ijire. Sa ye tiquina basi ñañene tiquina yeri buhiri wahiquiõore wejẽ ẽjũa mũo, Cohãcjũre sinine. Apequina masare yedohoye tehe, tiquina ñañe buhiri tiquina sini basariro sahata tiquina basi tiquina ñañe buhiri gãhũre sinine Cohãcjũre.

⁴Sa yero tiquiõo basi tiquiõo esa tuharo pahia pũhtoro sajãedare. Cohãcjũ pehe tiquiõore besero, pahia pũhtoro sõre. Panopũ cjũno Aaron mũnanore tiquiõo cũriro sahata apequina pahia pũhtoa gãhũre cũre tiquiõo. ⁵Sata Cristo gãhũ tiquiõo basi tiquiõo esa tuharo pahia pũhtoro sajãedahye. Cohãcjũ pehe tiquiõore pũhtoro sõno, ohõ saha niahye:

Yũhũ macũ ijire mũhũ. Miare mũhũre bajuagũ yei, niahye Cohãcjũ.

⁶Ape taha ohõ saha niahye Cohãcjũ Cristore:

Ijipihitiye decori pahi ijiducugũta mũhũ. Melquisede tiquiõo ijiriro saha pahi ijiducugũta mũhũ, niahye tiquiõo macũnore.

⁷Cristo ahri yehpapũ ijiro sañuducuye mehna, utiye mehna mari Pacũre tutuaro siniahye tiquiõo “Yũhũre masona”, nino. Mari Pacũ pehe tiquiõore yariariquiõore maso masiniquiõo ijire. Tiquiõo sa sinigũ mari Pacũ tũhoahye tiquiõore. Mari Pacũ cahmeñe dihitaro tiquiõo ye duagũ ihñano mari Pacũ pehe tiquiõo sinidire tũhorro, tiquiõore yũthiahye. ⁸Sa yero Cristo Cohãcjũ

macuno ijieperota ñano yuhduahye tiqiro. Sa ñano yuhduro yuhthiahye mari Pacure. Sa yuhthiro quehnoano yuhthi masiahye. ⁹Sa ñano yuhduro, curusapũ yariaro ijipihtiyequina tiqirore yuhthiatiquinare yuhduoatiqiro wahahye. ¹⁰Sa yero mari Pacũ pehe tiqirore pahia pũhtoro cũahye. Sa yero Melquisede pahia pũhtoro tiqiro ijiriro saha ijire Cristo.

Cristo yequina tiqirore wacũ tutua duhugũ cuarĩne

¹¹Peye ohõ saha ijiyere musare yahu nemo duaja usã. Usã sa yahu nemo duepegũta musa pehe dapu bũtina ijire. Sa yena musare yahuro basioerare usãre. ¹²Yoari pje Cristo yequina ijimene musa. Sa yena yojopũre apequinare buhenapũ iji tuhasaboya musa. Musa sa ijiborina ijiepegũta apequina musa pehere buheeta. Cohãcjũ yere mijoeda cjũne buheye dihitare tũhore musa. Macanagã epẽco dihitare tiquina apũ masino saha musa gũhũ mijoeda cjũne dihitare quehnoano tũhore. Coã buhe dũcayequina yero saha ijire musa. ¹³Epẽcore apũnequina macanagã ijinine. Tiquina yero saha musa gũhũ ijire. “Ahri ñañe ijire. Ahri quehnoañe ijire”, ni ihña masiedare musa. ¹⁴Ihyayere ihyayequina pehe bũcũna ijire. Tiquina yero saha ijieyeyequina quehnoano tũho masinequina quehnoano buheriquina ijire. “Ahri ñañe ijire. Ahri quehnoañe ijire”, ni ihña masine tiquina pehe.

6 ¹⁻²Sa yena Cohãcjũ yere quehnoano masina, quehnoano yuhthina ijihna. Cristo yere coã warore mari buhe dũcana ohõ saha masi dũcaũ: Mari ñañene yerire bujũa witi, duhuro cahmene. Mari ñañene yeri buhiri pecapũ wahanata. Sa yena Cohãcjũre wacũ tutuaro cahmene marine. Ahrire coã waropũre marine buhe dũcari. Sa ye wame yeyere, omocarine marine tiquina duhu peoyere, yariariquina tiquina masa mũjañene, ahri deco pihtiri bato Cohãcjũ buhiri dahreatire, tiqiro buhiri dahreatiquina tiquina ñano yuhduducuato gũhũre ahri gũhũre coã waropũre marine buhe dũcare. Sa ijieye buheyere masi tuhasana, quehnoano buhe nemouhna tja. ³Sa yena Cohãcjũre, tiqiro ye gũhũre masi nemouhna. Cohãcjũ cahmegũ sa yenata mari.

⁴Mari sa yerana Cohãcjũ yere duhuboaga mari. Cohãcjũ yere duhuriquinare ne pari turi tiquina ñañe yerire tiquinare bujũa witi gũ ye masiedare. Sa ijieyeyequina Cristo tiqiro yuhduomediquina ijieye, Espĩritu Santore cũomedi.

⁵Sa ye Cohãcjũ ye yahuducuyere tũhoye quehnoañe ti yahuducuye ijigũ masimedi. Sa ye pihtiri deco batopũ Cohãcjũ tutuaye mehna mari sa ijiducuatire, masare tiqiro buhiri dahreato gũhũre tiquina masimedi.

⁶Sa ijiriquinapũre Cristo yere tiquina duhugũ pari turi tiquina ñañe yerire tiquinare bujũa witi gũ ye masiedare. Sa duhuriquina Cohãcjũ macunore pari turi curusapũ tiquina quẽ bihaboriro saha tiqirore yeye nine. Tiquina sa yegũ ihñañe apequina masa Cristore bujũpere. Sa ye tiquina ñañe yerire tiquinare bujũa witi gũ ye masiedare. ⁷Ohõ saha ijire ti mari queoye mehna buhegũ: Quehnoari yehpare pajiro acoro ahtagũ ti oteye quehnoano bũcũna, dũca tire. Sa yero ti wese upũro dũcare cũore tiqiro ihyatire. Ti yehpa Cohãcjũ

quehnoano tiquiro yeri yehpa ijire. Sa quehnoano yere tiquiro yequina gũhure. ⁸Sa ijiepegũta pota mehna, taa mehna ti yehpa diaro duhseati ijierare. Sa ijiri yehpare Cohãcjũ ujũa cohãnota. Sata yere tiquiro tiquirore duhuyequinare.

Cristore sa ño peoducuyequinare yũhduore Cohãcjũ

⁹Yũhũ cahĩna, musare sa ni yahuepegũta musa pehere “Cristore duhuna ijire”, nigũ niedaja. Mũsa pehe Cristo yũhduonohrina ijire. Sa yena quehnoañene yena niaga musa. Ahrire masiaja yũhũ. ¹⁰Quehnoano mari yeri wapa queoro marine quehnoano yeriquiro ijire mari Pacũ. Sa yero tiquiro yere musa tutuaro dahrari wapare bosì tiquiro. Tiquirore cahĩna quehnoano yedohore musa tiquirore. Apequina Cristo yequina gũhure yedohore musa. Sa yena tiquinare yedohona niaga musa. Sa yerina musa ijigũ ihñano bosì tiquiro. ¹¹Mũsa catiro puno apequinare musa cahĩducugũ, musa yedohoducugũ gũhure cahmeaja usã. Mũsa sa yeri wapa queoro quehnoano yerota mari Pacũ musare. ¹²Sa yena musa cape bajũna musa ijigũ cahmedaja usã. Apequina Cristo yequina ñano yũhduæpeta tiquiro yere ne duhuerare. Tiquina sa yegũ ihñano mari Pacũ “Musare ohoutja”, tiquiro nidire tiquinare oho pehorota. Sa yena musa gũhũ tiquina yero saha yeducuya.

¹³⁻¹⁴Panopũ Cohãcjũ Abrahãre ohõ saha ni cũahye. “Yũhũ wame mehna ahrire potò nii niaja mũhure. Mũhure quehnoano yeitja. Sa yegũ mũhũ panamena jji turiayequinare peyequina masa ijigũ yeitja”, ni yahu cũahye Cohãcjũ. Sa ni yahu cũno tiquiro ye wame mehna wame peo yahuro niahye. Apequiro tiquiro bui ijiriquiro ne mariedagũ tiquiro ye wame mehna tiquiro basita sa wame peo yahuahye. ¹⁵“Mũhure quehnoano yeitja”, Cohãcjũ tiquiro ni cũrire Abrahã pehere quehnoano tiquiro cohtegũ ihñano tiquiro nidiro sahata tiquirore quehnoano yeahye. ¹⁶“Cohãcjũ mehna potò nina niaja”, masa pehe niñe, tiquina bui ijiriquiro wame mehna wame peo yahuye nine. “Cohãcjũ mehna potò nii niaja”, ihcãquiro nigũ tũhoro apequiro pehe tiquiro mehna cahme dũse tutuariquiro pehe “Ijirota ijire”, ninota. Sa ye cahme dũse tutua duhueta tiquina. ¹⁷Sa yero Cohãcjũ Abrahãre “Mũhure quehnoano yeitja”, ni cũno wame peo yahuahye. Tiquiro sa wame peorire tũhona “Ijirota ijire ti. Tiquiro sa nidi ne comesasi”, ni, masiaja mari. Tire mari masiato saha tiquiro ni cũri mehna wame peo yahuahye.

¹⁸Sa yero pũaro tiquiro ni yahuducuri mehna tiquiro nidi potò ijigũ masigũ yeahye Cohãcjũ marine: Tiquiro ni cũri gũhũ tiquiro wame peori gũhũ ti pũaro mehna tiquiro ni yahuducurire yahuahye tiquiro. Sa ye tiquiro ni cũri gũhũ, tiquiro wame peori gũhũ ne comesaerare. Sa yero Cohãcjũ ne ni mehoedare. Tiquiro sa ijiriquiro ijigũ masina, mari tiquirore quehnoano wacũ tutuana, bucueye mehna marine tiquiro yũhduoatire cohtenatja mari. ¹⁹⁻²⁰Sa tiquiro yũhduoatire cohtena, wacũ tutuana ijiaja mari. Sa yena cueraja. Pahia pũhoro Cohãcjũ ijiri tucũ waropũ sajãno, cahmotari suhtirore yũhdu sajãre. Sa sajãno masa ye ijiatire sini basare Cohãcjũre. Tiquiro sa yeriro sahata Jesu gũhũ came mari wahato sahata uhmũsepeũ Cohãcjũ

cahapu waharo, mari ye ijatire sini basare Cohäcjöre. Topu mari wahato pano tiqiro pehe wahahye. Sa yero ijipihtiye decori pahia puhtoro ijire tiqiro. Melquisede pahi tiqiro ijiriro saha pahia puhtoro ijire tiqiro gühu.

Melquisede pahi tiqiro ijiriro saha Jesu pahia puhtoro ijire

7 ¹Melquisede Salé wame tiri maca cjéna puhtoro ijiahye. Sa yero pahi ijiro Cohäcjö tutuariquirore, umhuse cjünore sini basariquiro ijiahye. Sa yero apequina puhtoare Abrahä wejé tuhasa, tiqiro tojoa tagü waro Melquisede tiqiro ya macapu ijiriquiro Abrahäre piti caro esahye. Sa piti caro tiquirore sini basahye Cohäcjöre. “Quehnoano yeya ahriquirore”, ni sini basahye Abrahäre Cohäcjöre. ²Tiqiro sa piti cato pano Abrahä pehe tiquirore ihña tuhtiyequinare wejé tuhasa tiqiro wejédiquina puhtoa yere neahye. Tiqiro sa nedire mehenogä ohoahye Melquisedere. Melquisede tiqiro wame pehe “Puhtoro quehnoano yeriquiro ijire”, nino nine. Sa yero tiqiro Salé wame tiri maca cjéna puhtoro ijigü tiqiro wame ohö saha nino nine: “Puhtoro quehnoano ijigü yeriquiro”, nino nine. “Salé” nino, “Quehnoano ijije”, nino nine. ³Ne Melquisede pacusumhare, tiqiro pano jji muhtariquinare, tiqiro acayere tiquina yahu ojoa ohöri mariedare. Tiqiro masa bajarire, tiqiro yariari gühure yahu ojoa ohöri mariedare. Sa yero sa ijiducuriquiro yero saha ijire tiqiro. Tiqiro sa ijiriquiro ijigü Cohäcjö tiqiro mehna marine queoye mehna buhere. Cohäcjö macano tiqiro pahi ijirire marine buhere. Melquisede pahi sa ijiducuriquiro yero saha ijire. Tiqiro yero saha Cristo gühu pahi sa ijiducuriquiro ijire.

⁴Sa yero Melquisede ne ihyo ijiriquiro ijierahye. Abrahä mari ñecu manano puhtoro waro ijieperota mehenogä tiqiro nedire Melquisede pehere ohoahye. ⁵Sa yero Cohäcjö dutiye Moiserre tiqiro cüri ijipihtiyequina apequina Israe masare to punota wapa ye dutire. Sa dutiro Leví panamena jji turiayequinare tiquina acaye wapa yerire ñehe dutiro, cüahye. Leví panamena pahia wahae tiahye. Sa ye Israe masa Abrahä panamena jji turiayequina ijieperota tiquina pahiare wapa yee tiahye. ⁶Melquisede pehe Leví panamino jji turiariquiro ijieraperota wapa neahye Abrahäre. Sa yero Cohäcjö “Muhure quehnoano yeitja”, tiqiro ni cüriquiro ijieperota Abrahä pehe Melquisedere wapa yeahye. Sa yero Melquisede pehe Cohäcjöre Abrahäre sini basaro quehnoano ye dutiahye.

⁷Quehnoano ye dutiriquiro Melquisede pehe tiqiro quehnoano ye dutinohriquiro Abrahä bui ijire. Tire mari quehnoano masiaja. ⁸Mari mehna cjéna pahia marine mehenogä wapa neñequina mari yero saha masa ijire. Sa ye yariatiquinata ijire tiquina gühu. Ahriquiro Melquisede pehe Abrahäre mehenogä wapa nediquiro sa catiducuriquiro yero saha ijire. Tiqiro yariarire yahueraro, sata nino niahye Cohäcjö yere tiquina ojoari püpü. ⁹Yojopü cjéna Leví panamena jji turiayequina pahia ijije, mehenogä wapa nene. Sa ijijequina tiquina ijiepegüta Abrahä Melquisedere mehenogä wapa yero, ijipihtiyequina Leví panamena ye ijiasi gühure oho basaro saha yero niahye. Sa ye tiquina gühu Melquisedere mehenogä ohoyequina yero saha ijire. ¹⁰Melquisedere Abrahä tiqiro wapa yeri

pjere Leví pehe masa bajueraniahye. Sa ijieperota tiquiro ñecuno munano Abrahã pagupũ tiquiro ijiboriro saha Leví pehe iji tuhasaro niahye. Sa yero Melquisede Abrahãre tiquiro piti cagũ Leví gũhu tiquiro ñecuno munano mehna ijiro saha ijiro niahye. Sa ye Leví, tiquiro panamena mehna Melquisedere mehenogã wapa yeyequina yero saha ijiye, tiquina tiquiro docapũ ijiye niahye.

¹¹Tiquiro dutiyere cüno Cohãcjũ Levíre tiquiro acaye gũhure pahia iji dutiahye. Sa ye tiquiro dutiye nidiro sahata tiquina pahia wahiquinare wejẽ ujãa mũo, Cohãcjũre sini basahye masare. Tiquina sa yeri mehna mari yũhdũna, apequiro pahi sijoro saha ijiriquiro pahire cahme nemoedaboya mari. Sa yena apequiro pahire cahmeaja mari yojopũre, Melquisede yero saha ijiriquirore. Leví ya curua cjũno Aaron munano yero saha ijiyequina pahiare yojopũre mari cahmedaja. ¹²Sa yena pahiare comesana niaja mari. Mari sa comesana, marine dutiye gũhure comesaro cahmene marine. ¹³Aaron, Leví gũhu tiquina ya curua cjẽna dihitate pahia sajã duti mũhtamahye Cohãcjũ, tiquiro dutiyere cüno. Tiquiro sa dutiepegũta yojopũre mari pũhtoro pahi sũriquiro ape curua cjũno ijire. Sa ye ti curua cjẽna ne pahia sajãedahye. ¹⁴Tiquiro Cristo Judá ya curua cjũno masa bajuahye. Tire mari quehnoano masiaja. Sa yero, Moise pahia sũno, Judá ya curua cjẽnare ne pahia sũeda tiahye.

¹⁵Ahrire masina, ohõ saha mari quehnoano masiaja: Yojopũre wahma tiquiro sũriquiro pahi Cristo Melquisede yero saha ijiriquiro ijire. ¹⁶Panopũ cjẽ dutiye ti nidiro sahata Leví ya curua cjẽna dihita pahia sajãhye. Yojopũre tiquiro sũriquiro pahia tiquina yero saha pahi sajãedare. Tiquiro Cohãcjũ tutuaye mehna ijipihtiyete decori ijiriquiro ijire. Sa yero ti tutuaye mehna pahi sajãhye tiquiro. ¹⁷Ohõ saha nine Cohãcjũ yere tiquina ojoari pũpũ:

Ijipihtiyete decori pahi ijiducugũta mũhu. Melquisede pahi tiquiro ijiriro saha pahi ijiducugũta mũhu, niahye Cohãcjũ tiquiro macũnore, ni ojoahye panopũ.

¹⁸Ti dutiye tiquiro cũ mũhtari dutiye dũhseati ijierahye. Sa yero ti dutiyere duhu cãhye Cohãcjũ. ¹⁹Moisere tiquiro cũri dutiye mehna ne yũhdũerare masa. Sa yero yojopũ pehere Cohãcjũ marine tiquiro yũhdũoatire marine cũre. Tiquiro sa yegũ yojopũre tiquiro mehna yahuducu masiaja.

²⁰Sa yero Cristore pahi sũno, wame peoro mehna tiquirore sũahye. Apequina pahiare tiquiro yero saha wame peo sũedahye. ²¹Cristo pehe Cohãcjũ wame peoro mehna pahi sajãhye. Ohõ saha niahye tiquiro Pacũro Cristore:

Yũhu mũhu pũhto yũhu wame mehna mũhũre poto yahũtja. Sa yegũ ahrire ne duhu cũno marieno yahuaja mũhũre. Pahi sa ijiducugũta mũhu, ni cũahye Cohãcjũ tiquiro macũnore.

²²Sa wame peo cũno, wahma buheyere quehnoañe buheyere marine cũno, marine tiquiro yũhdũoatire cũno niahye. Panopũ cjẽ dutiye yũhdũoro mari quehnoano ijiatire cũno niahye. Sa yero Cohãcjũ “Mũsare yũhdũoutja”, tiquiro nidiro sahata yero taro, Jesure ohoahye marine yũhdũoatiquirore. ²³Iji mũhtariquina pahia tiquina yariagũ ihñãne apequina camesa sajãre tja. Sa ye tiquina peyequina pahia


wahare. ²⁴Jesu pehe sa ijiducure. Sa ye tiqirore comesayequina mariedare pahia. ²⁵Sa yero tiqiro sa ijiducuro, Cohācjüre sa sini basaducure tiqiro yequina ye ijiatire. Sa yero Cohācjü mehna tiquina sa ijiducuatō saha masare yūhdæo masine tiqiro. Ijipihtiyequina tiqirore wacū tutuayequina Cohācjü cahapū wahaeta. Sa yero Jesu ijire potota tiquinare yūhdæoriqiro.

²⁶Sa yero Jesu ijire mari yaqiro pahia pūtoro. Tiqiro pūritare tutuaro cahmeaja mari. Ne ñañe buhiri marieniquiro ijire tiqiro. Sa yero masa yero saha ne ñañene yerare. Sa yero Cohācjü tiqirore ñañequina cahapū ijiriquirore neano, ũhmūsepū cū, ijipihtiyequina apequina bui pūtoro sōahye. ²⁷Apequina pahia yero saha ijierare tiqiro. Tiquina pehe decoripe wahiquinare wejē, ũjūa mæo, Cohācjüre sinie tiri. Tiquina basi tiquina ñañe buhirire sini mūhtae tiri. Came apequina masa tiquina ñañe buhiri gūhure sini basae tiri tiquina. Sa ye peye tahari tiquina Cohācjüre sinie tiri. Jesu pehe pahi ijiro, ihcā tahata tiqiro yariari mehna siniahye Cohācjüre masa tiquina ñañe buhirire yūhdæoro taro. Sa yariaro tiqiro basi tiqiro pagure tiqiro jeripohna gūhure tiqiro ohoboriro saha yero niahye. ²⁸Cohācjü dutiye Moiserē tiqiro cūri pahia pūhtoare sajā dutire. Sa sajāepeta ñañe marieñequina ijierare sa pahia sajāñe. Ti dutiye bato ijieye buheye mehna Cohācjü wame peoro mehna tiqiro yahuri buheye mehna tiqiro macæno pahia pūtoro sajāhye. Tiqiro pehe ñañe marieniquiro sa ijiducure.

Cohācjü “Mūsare yūhdæoutja”, ni cūahye tja Moiserē tiqiro cūrire comesaro. Tire yahu basariquiro ijire Jesu

8 ¹Ti ijipihtiyere yahuna, ahri pūritare mūsare yahuna tana niaja: Mūsare ũsā yahuriquiro pahia pūtoro tiqiro pūrita mari yaqiro waro ijire. ũhmūsepū Cohācjü tutua yūhdæariquiro tiqiro pūtoro dujiro potō pehe dujire Cristo mari yaqiro pahia pūtoro. ²Sa yero ahri yehpa cjā wūhūpū, masa tiquina yeri wūhūpū pahia dahrayere yerare tiqiro. ũhmūsepū ijiri wūhūpūre mari pūtoro tiqiro yeri wūhūpūre pahia dahrayere yere tiqiro. Ti wūhū pūrita Cohācjü waro ya wūhū ijire.

³Ijipihtiyequina ahri yehpa cjēna pahia pūhtoahiquinare wejē ũjūa mæo, ohore Cohācjüre ño peoye. Sa ye dutie tiahye tiquinare. Mari yaqiro pahi gūhure Cohācjüre oho dutiahye. Mari ñañe buhirire tiqirore oho dutiahye. Sa yero Cristo mari ñañe buhiri yariaro bucuegū yeahye Cohācjüre, pahia pūhtoahiquinare Cohācjüre ohoye tiquina bucuegū yeriro saha. ⁴Mari judio masa mari dutiye ti nidiro sahata ahri yehpapū pahia masa tiquina ñañe buhirire ohore Cohācjüre siniñe. Sa ye ahri yehpapū pahia iji tuhasare. Sa yero Jesu pehe mari yaqiro pahi ahri yehpapū ijinino, pahi ijieraboa tiqiro pehe. ⁵Ahri yehpa cjēna pahia tiquina dahrayere ahri yehpa cjā wūhūpūta dahrare. Ti wūhūpū Cohācjüre tiquina ño peorire ihñana ũhmūse cjā wūhūpūre tiqirore mari ño peoatire masi cjūna niaja. “Ti wūhū yero saha ijire”, nino niahye Cohācjü cūnūpū Moiserē tiqiro ya wūhūre dahre dutiro. Tiqiro sa dahreato panogā Cohācjü ohō saha niahye tiqirore. “Cūnūpū mūhūre yūhū ihñoriro sahata ti wūhū ijiriro sahata



(Hebreos 8.5)

ya wuhũre queoro dahreya”, niahye Cohãcjũ tiquirote. ⁶Sa yero yojorũ pehere Jesu pahĩ ijero, tiquiro dahraye apeqũna pahia ye dahraye yũhdũoro ijire. Ihyo waro ijierare. Cohãcjũ marine “Musare yũhdũoutja”, tiquiro ni yahuri panorũ cjẽ dutiye Moiserẽ tiquiro cũri dutiye yũhdũoro ijire. Marine tiquiro yahuri ti dutiye yũhdũoro marine quehnoano ijigũ yeeta. Sa yero marine yũhdũo basariquiro ijero, Cristo pehe apeqũna pahia yũhdũoro ijire.

⁷Coã waropũre tiquiro dutiri mehna mari yũhdũeraja. Ti dutiye mehna mari yũhdũgũ, apeye buheyere cũedaboya Cohãcjũ. ⁸Sa yero ti dutiyere tiqũna ihcãno sahaerarire yahuro ohõ saha niahye tiquiro yeequinare Israe masare:

Ohõ saha nine mari pũtoro: “Quehnoano tũhoya. Camerũ apeye buheyere yahutja yequinare Israe masare, Judá ya curua cjẽna gũhũre. ⁹Ti buheye tiqũna ñecũsumũa mũna iji turiayequinare yũhũ yahu cũri yero saha ne ijisi. Yũhũ basi tiqũnare Egipto yehparũ ijieyequinare wogũ tiqũnare yahu cũmi. Yũhũ sa ni yahu cũrire yũhdũũdũcare tiqũna. Tiquina sa yegũ ihũagũ wahmanore tiqũnare yũhũ yahumedire duhu cũhũ.

¹⁰Sa yegũ camerũ Israe masare ohõ saha ni yahutja: Yũhũ dutiyere tiqũnare wacũgũ yeitja. Sa ye yũhũ dutiyere yũhtietja. Sa yegũ yũhũ Cohãcjũ tiqũna pũhto, tiqũnare ihũa ihbogũ ijigũtja. Sa ye tiqũna pehe yeequina masa ijietja. ¹¹Sa ye ti pjere tiqũna mehna cjẽnare ne tiqũna ohõ saha cahme nisi: ‘Mari pũtorore Cohãcjũre masiũa mũsa’, ne ni cahme buhesi. Tiquina ijipihtiyequina yũhũre masi tuhasaeta. Macanagã, bũcũna gũhũ yũhũre masiũequina dihita ijietja. ¹²Sa yegũ tiqũna ñaũe yerire boutja yũhũ. Sa yegũ tiqũnare buhiri dahresi yũhũ. Tiquina ñaũe yerire pari turi wacũsi yũhũ”, niahye mari pũtoro, nine Cohãcjũ yere tiqũna ojoari pũpũ.


¹³Yojorũre marine tiquiro ye buheyere cũno, panorũ cjẽ dutiyere duhuro nidi. Sa yero mũna dutiyere tiquiro duhuri bato ti dutiye comesaa wahare.



(Hebreos 8.13)

**Ahri yehpa cjã tucũre ãhmũse cjã tucũ gũhũre
Cohãcjũre ño peori tucũre yahuahye**

9 ¹Coã waropũre Cohãcjũ tiquiro dutiyere Moiserẽ cũno, masa tiquirore tiquina ño peoato gũhũre cũahye. Sa yero Cohãcjũre tiquina ño peoati wũhũ gũhũre ye dutiro cũahye. ²Ti wũhũ wahiquina cahseri wũhũ ijiahye. Pũa tucũ cũoahye. Paji cjũri tucũ tiquina sajã sa muhtari tucũ “Cohãcjũ ya tucũ”, wame tiahye. Ti tucũpũ tiquina sihõ docodũ ijiahye. Sa yero mesa gũhũ ijiahye. Ti mesa bui Cohãcjũre tiquina ohori pã pesahye. ³Ape tucũ suhti cahseri mehna tiquina cahmotari tucũ ijiahye. Ti tucũ “Cohãcjũ ijiri tucũ waro”, wame tiahye. ⁴Ti tucũpũ uru mehna tiquina yeri altar, ehmeo bueyere tiquina ãjũari altar ijiahye. Sa yero uru quehnoañe mehna tiquina duhu ohõri acaro topũ cuñahye. Ti acaro puhiapũ uru pa manã wame tiye ihyaye pose tiri pa ijiahye. Sa yero ti acaro puhiapũ Aaron yadũ tuadũ pũri tidũ ijiahye. Sa yero pũa pjĩ utã pjĩni Cohãcjũ dutiyere tiquiro ojoari pjĩni gũhũ ti acaro puhiapũ sañahye. ⁵Ti acaro bui pũaro angele queoye ijiahye. Ti queoye Cohãcjũ asi siteyere, ti tucũpũ tiquiro ijiyere ihñoñe niahye. Ti acaro mohano bui tiquina wũye dũpũri mehna



(Hebreos 9.5)

mohahye. Ti acaró mohano bui masa ñañe buhirire tiquina ohorire wejê site peoe tiahye pahia pũhtoro. To punota yahutja ahri wũhũ cjẽne yojopũre.

⁶Sa ye ti wũhũre tiquina quehnoano quehnori bato pahia decoriye tiquina sajã sa mũhtari tucũpũ sajã sa, tiquina dahrayere yee tiahye. ⁷Sa yero pahia pũhtoro dihita ape tucũpũ sajãhye. Cũhmaripe ihcã tahata tiquiro sajãri deco boropũta sajãe tiahye tiquiro. Sa sajãno tiquina wejêdiquiro wahiquire tiquina ohoriquiro diire ne sajãno, Cohãcjũre ño peoe tiahye. Dii marieno ne sajãedahye. Tiquiro basi tiquiro ñañe yeri buhirire diire ne sajãe tiahye. Sa yero ijipihtiyequina apequina Israe masa “Ñañe ijiaga”, nino marieno tiquina ñañe yeri buhiri gũhũre diire ne sajãe tiahye tiquiro Cohãcjũre sinino taro.

⁸Ijipihtiyehi ahri mehna Espĩritu

Santo ohõ saha ni marine buhero nine: Ti wũhũpũ Moiserẽ tiquiro cũri wũhũpũ mari ño peorĩna, tiquiro cũri dutiyere yeatina ijinina, ihyo ijina Cohãcjũre ño peona wahaeraboya mari. Pahia pũhtoro dihita Cohãcjũ ijiri tucũ waropũ sajã masine. Sa yena ihyo ijieyequina tiquina ño peoye wahaeraro saha sa ijiboya mari Moiserẽ tiquiro cũri dutiyere yena.

⁹Ahri ijipihtiyere Cohãcjũre ño peori wũhũpũ ijiyere marine cũno, marine yojopũ cjẽnare buhero niahye Cohãcjũ. Wahiquire wejê Ƴjũa mũo, masa Cohãcjũre tiquina ño peori mehna ne Cohãcjũ cahapũ wahasi. Tiquina sa yeri mehna tiquina ñañe yerire cose werahye. ¹⁰Sa wahiquire ohoye, tiquina ihyaye, tiquina sihniñe, tiquina pagũ coseye, tiquina ohõ saha yeye mehna Cohãcjũre ño peoe timahye. Ahri tiquina sa yeri ihyo warota ijire yojopũre. Sa yeye ti dutiye Moiserẽ tiquiro cũri dutiye marine quehnoana wahagũ yerahye. Sa ye wahma buheyere Cohãcjũ tiquiro cũri bato mũna dutiye pehe dũhseati ijierare.

¹¹Cristo pehe mari pahia pũhtoro ijero ahta tuhasari jiri. Sa ijero marine quehnoañene cũ tuhasari jiri. Cohãcjũre ño peori wũhũ Ƴhmũsepũ pahia pũhtoro tiquiro dahrari wũhũ apequina pahia tiquina dahraye wũhũse yũhdũoro quehnoari wũhũ ijire. Ƴhmũse cjã wũhũ ijire. Ti wũhũ ahri yehpa cjã wũhũ ijierare. Sa yero masa tiquina yeri wũhũ ijierare. ¹²Sa yero Cristo Ƴhmũsepũ Cohãcjũ ijero waropũ ihcã taha sajãhye mari ñañene yeri buhirire Cohãcjũre ohoro saha yero taro. Topũ Ƴhmũsepũ ohõpũ tiquiro ijiri tucũ waro yero saha ijire mari queoye mehna buhegũ. Sa yero chivoa diire, wecũagã

diire ne sajã, ohoerahye tiqiro. Tiquiro pehe tiqiro ye dii warore Cohãcjure tiqiro ohoro saha yero niahye yariaro. Ijipihtiye decori Cohãcju mehma mari ijiducuato saha tiqiro ye diire cohãhye. Mari ñañe buhirire yariahye.

¹³“Yariariquinare dahra peona musa pagu wete tina ijire”, ni cãahye Cohãcju Moiserere. Sa ijije ñañene wete tiyere cose wee tiahye chivoa diire tiquina ohori mehna. Wecua diire tiquina ohori mehna, wecuaagãre tiquina çjãari nitine tiquina ohori mehna sa ijije ñañene cose wee tiahye. ¹⁴Sa ijije ñañene wahiquina diire tiquina ohori mehna, nitine tiquina ohori mehna tiquina cose weriro saha ti yãhdũoro Cristo pehe tiqiro diire cohãno mehna mari ñañe yerire quehnoano cose we peho cãre. Tiquiro ñañe marieniquiro ijiro, curusapu yariaro tiqiro basita tiqiro pagu, tiqiro jeripohna mehna Cohãcjure ohoro saha yeahye. Espiritu Santo sa ijiducuriqiro yedohoye mehna sa yeahye tiqiro. Sa ye mari ñañe yerire tiqiro cose wegũ ihãano mari ñañe buhirire Cohãcju bo cãhye. Ti ñañe buhirire cõona pecapu wahaborina ijimi mari. Tiquiro cose wenohrina ijina, Cohãcju catiriquiro tiqiro cahmeñene ye masiaja mari.

¹⁵Sa yero “Ohõ saha musare yãhdũoutja”, masare pari turi Cohãcju ni yahu cãgũ Cristo pehe tiqiro yahuyere yahu basariqiro ijire. Sa yahu basare tiqiro Cohãcju beseriquinare yãhdũoro taro. Tiquiro sa yãhdũogũ ijipihtiye decori tiqiro mehna ijinata mari tiqiro yequina. Sa yena mari tiqiro yequinare Cohãcju marine ohoatire cõonata mari. Moiserere tiqiro cãri dutiye dihita ijigũ masa tiquina ñañe buhiri ijiniahye. Sa yero curusapu yariaro ti pjeta tiquina ñañe yeri buhirire yãhdũoahye tiqiro yequinare.

¹⁶⁻¹⁷Masuno came tiqiro acayere tiqiro ohoatire ojoa ohõyure papera pũpũ. Tiquiro ohoatire yahuro taro ojoa ohõyure. Ti pũre ojoa ohõyuriquiro tiqiro yariaranigũ ti pũ dũhseati ijierare. Tiquiro acaye tiqiro cõorire nea masiedare. Sa ye tiqiro yariagũ ihãañe ti pũpũ tiqiro ni ojoariro sahata tiqiro yere neañeta tiquina. ¹⁸Tiquiro yariato pano ti pũ dũhseati ijieraro sahata yariaro marieno dii wijiario marieno Cohãcju Moiserere tiqiro cãri dutiye gũhũ ne dũhseati ijieraboya. Sa yero wahiquiro diire tiqiro wejẽ siteri bato ti dutiyere potota yero niahye.

¹⁹Sa yero ohõ saha ye mãhtahye Moise: Cohãcju tiqiro cãri dutiyere masare yahu pehoahye. Came wecuaagã diire, chivoa diire aco mehna moreahye. Sa yero hisopo wame tidũ dũpũ mehna oveja poari sohãñe mehna tiquina ñimiori poarire torẽahye. Ti dũpũ mehna diire soharo, Cohãcju dutiyere tiqiro ojoari pũ bui wejẽ site peoahye. Ijipihtiyequina masa bui gũhũre wejẽ site peoahye.

²⁰Sa yero ohõ saha niahye tiqiro: “Cohãcju marine tiqiro yahuri tiqiro dutiri ahri dii mehna poto ijigũ masiaja mari. Ahri diire ihãana tiqiro nidiro sahata marine tiqiro yeatire masiaja mari. Ti dutiyere yũhti dutiahye tiqiro marine”, niahye Moise. ²¹Sa yero masare tiqiro yeriro saha Cohãcjure tiquina ño peori wũhũ wahiquina cahseri wũhũre, ijipihtiye ti wũhũpũ ijije gũhũre wejẽ siteahye. ²²Sa tjire. Ti dutiye ti nidiro sahata peye ñañene dii cohãno mehna cose wero cahmene. Mehenogã dũhsaye ñañene apee boro mehna cose wegũ quehnoare. Sa yero Cohãcju mari ñañe yerire ne bosì dii cohãedagũ.

Cristo tiquiro diire cohãno, yariaro, tiquiro yequina ñañe yerire cose weahye

²³Ti ijipihtiye Cohãcjüre tiquina ño peori wũhũ, ti wũhũpũ ijiiye gãhũ ùhmũse cã wũhũpũ ijiiye yero saha ijiahye mari queoye mehna buhegũ. Ùhmũse cã wũhũ pehe potota Cohãcjũ ya wũhũ waro ijire. Sa yero ahri yehpa cã wũhũre, ti wũhũpũ ijiiye gãhũre wahiquina diire tiquiro wejẽ siteri mehna cose wero cahmeahye. Sa ye ti yũhdũoro ùhmũsepũ wahatiquinare tiquina ñañe buhiri tiyequinare cose wero cahmene. Sa yero wahiquina yũhdũoro ijiriquiro ye dii tiquiro cohãno mehna tiquina ñañe yerire cose wero cahmene.

²⁴Sa yero Cohãcjüre tiquina ño peori wũhũ masa yeri wũhũ ijire. Ùhmũse cã wũhũ yero saha ijire ti wũhũ gãhũ, mari queoye mehna buhegũ. Sa yero Cristo pahi ijiro, marine sini basaro taro ahri yehpa cã wũhũre sajãedahye. Potota ùhmũsepũ wahahye tiquiro Cohãcjũ caha marine sini basaro taro. ²⁵Mari judio masa mari pahia pũhtoro cũhmaripe Cohãcjũ ijiri tucũ waropũ sajãe tiahye wahiquina diire ohoro taro. Cristo pehe tiquiro diire Cohãcjüre ohoro saha yero taro, yariaro, peye tahari sajãedahye. ²⁶Peye tahari yariariquiro ijiro, ahri yehpa iji dũcari bato peye tahari yariaboya tiquiro. Peye tahari tiquiro mari ñañe buhirire yariaducuriquiro ijiboya. Sa ijiboriquiro ijieperota pihitiri deco panogã yojopũre marine ijipihitinare yũhdũoro taro ihcã taha bajuahye tiquiro ahri yehpãpũ. Sa bajuahye yariaro taro, mari ñañe buhirire cohãno taro.

²⁷Ijipihitiyequina masa ihcã tahata yarieta. Tiquina sa yariari bato masa quehnoañequinare, ñañequina gãhũre beserota Cohãcjũ. ²⁸Ihcã tahata mari yariaro saha Cristo gãhũ ihcã tahata yariahye peyequina masa tiquina ñañe yerire cohãno taro. Came pari turi ahtarota. Mari ñañe yerire cohã tuhasariquiropũ ijirota. Sa yero pari turi mari ñañe yerire cohãno taro ahtasi. Sa ahtarota tiquirore cohteyequinare, bucueye mehna tiquirore ihña duayequinare yũhdũoro ahtarota.

10 ¹Cohãcjũ dutiye Moiseri tiquiro cũri quehnoañe buheye yero saha ijiepeta, ihcãno saha ijierare. Ti dutiye ti ye dutiriro saha cũhmaripe wahiquinare wejẽ, ƣjũa mũo, Cohãcjüre ño peoducure. Tiquina sa yeye mehna masa tiquina ñañe yerire boerare Cohãcjũ. ²Ti mehna tiquina ñañe yerire Cohãcjũ bogũ, ihcã tahata Cohãcjüre tiquina ño peori bato “Yojopũre buhiri mariedare usãre”, ni tuhotuboya masa. Sa ye pari turi wahiquinare wejẽ ƣjũa mũo, Cohãcjüre ño peo ohoeraboya. Duhu cãboya. ³Cũhmaripe wahiquinare wejẽ ƣjũa mũo, Cohãcjüre tiquina ño peogũ tiquinare ñañe buhirire wacũgũ yere. To punogãta yedoho duare ti tiquinare. ⁴Wecua dii mehna mari ño peori mehna, chivoa dii mehna mari ño peori mehna ne mari ñañe buhirire cohãedare.

⁵Ti ijirota ijire. Ti sa ijigũ ihñano Cristo ahri yehpãpũre tiquiro ahtato pano ohõ saha niahye Cohãcjüre:

Wahiquinare ƣjũa mũo tiquina ohogũ, trigore tiquina ohogũ gãhũre mũhũ ihñagũ bucuerare mũhũ. Sa yegũ yũhũ pagũre yeri mũhũ ya pagũ ijiatire. ⁶Ñañene tiquina cohãtore wahiquinare wejẽ, tiquina ƣjũa mũogũ ihñagũ bucuerare mũhũ. ⁷Mũhũ sa bucueragũ ihñagũ

ohō saha nii mūhure: “Mūhū cahmeno sahata yegū wahagūtja. Sata ni yahure mūhū ya pūpū”, nii yūhū, niahye Cristo tiqiro Pacurore.

⁸“Wahiqinare ʻjūa mūo tiquina ohogū, trigore tiquina ohogū gūhure ihñagū bucuere mūhū”, ni yahu mūhtahye tiqiro. Coā waropure tiqiro ye dutiye wahiqinare, trigo gūhure tiquina ohoye mehna ti ño peo dutiepegūta sa niahye tiqiro. ⁹Sa ni tuhasa ohō saha ni nemoahye: “Mūhū cahmeno sahata yegū wahagūtja”, niahye. Tiqiro sa nigū ohō saha masiaja mari. Panopū wahiqinare wejē ʻjūa mūoñe mehna tiquina ño peorire duhugū yero, apeye buheye pehere cūno niahye Cohācjū. (Sa cūno yojopure Cristo tiqiro yariari mehna masare yūhdūorota Cohācjū.) ¹⁰Jesucristo tiqiro pagure ohoro, yariaro, ijiphtina marine mari ñano yerire cohāre. Ihcā tahata tiqiro pagure ohore mari ñañene cohāno taro. Sa yero Cohācjū cahmeno sahata yero niahye.

¹¹Ijiphtina mari judio masa mari yequina pahia decoripe Cohācjūre ño peori wūhūpū dahraducure. Sa dahraducuye decoripe mūnanota wahiqinare wejē, ʻjūa mūo, Cohācjūre siniducure. Tiquina sa wejē ʻjūa mūoepēgūta ti ʻjūa mūori mari ñano yerire ne cohāedare. ¹²Cristo pehe ihcā tahata mari ñañe buhirire yariahye, mari ñañe yerire quehnoano cohā pehoro taro. Tire cohā tuhasa, wahaa wahahye tiqiro Pacuro cahapū tiqiro poto pehe dujiro waharo. Pūhtoro ijiro, topū dujire. ¹³Topū dujiro, cohtero nine. Tiquirore ihñā tuhtiyequinare Cohācjū pehe tiqiro yūhdūduca basatore cohtero nine. ¹⁴Sa yero ihcā tahata tiqiro yariari mehna tiquina ñañene cohānohriquinare ñañe marieñequina sa ijiducugū yere tiquinare. ¹⁵Ti ijirota ijire. Sata ni yahure Espiritu Santo marine. Ohō saha ni yahure tiqiro:

¹⁶Ohō saha nine Cohācjū: “Camepūre ohō saha ni yahūtja Israe masare. ‘Yūhū dutiyere tiquina wacūñepū cūtja’, ni yahūtja”, nine tiqiro.

¹⁷Ohō saha ni nemore Cohācjū:

“Tiquina ñañe yerire pari turi wacū nemosi yūhū”, nine tiqiro, ni yahure Espiritu Santo.

¹⁸Mari ñañe yerire tiqiro sa bogū pari turi mari ñañe buhiri yariatiquirore cahmedaja mari.

**Cohācjū cahapū esana, cuero marieno tiqiro mehna mari
yahuducuboriro saha tiqiro mehna yahuducu masiaja yojopure
(Mt 27.51; Mr 15.38; Lc 23.45)**

¹⁹Sa yena yūhū acaye, Cristo tiqiro yariaro mehna tiqiro dii cohāno mehna yojopure mari gūhū cuero marieno Cohācjū mehna yahuducu masiaja. Sa yena tiquirore sini masiaja. ²⁰Ahri yehpa cūno pahia pūhtoro Cohācjū ijiri tucū waropū tiqiro yemedi yojopure marine duhseati ijierare. Ti mehna Cohācjū mehna yahuducu masiedaja mari. Cristo pehe mari ñañene yeri buhirire yariaro tiqiro dii cohāri mehna Cohācjū mehna yahuducu masiaja mari. Pahia pūhtoro ti tucūpū tiqiro sajāriro sahata Cristo pehe Cohācjū cahapū esahye mari ñañe yerire bo dutiro waharo. Ti tucū cūñā cahserore cahmotari cahserore tiqiro

tuhře cohāriro saha Cristo tiqiuo pagure cohāhye Cohācjū mehna marine iji dutiro. ²¹Sa yero Cohācjū ya wuhupū dahrariquiro mari yaquiro pahi tutua yuhduariquiro ijire tiqiuo. ²²Sa yena Cohācjūre siniihna poto ni mehono marieno. Tiquirore quehnoano wacū tutua, cuero marieno tiquirore siniihna. Cristo mari ñaňe yerire tiqiuo cose wenohrinapū ijiaja. Sa yena “Buhiri tina ijiaja mari”, ni tuhhotuna ijieraja mari. Sa yena wete marieňe aco mehna mari cose wero saha Espiritu Santo tiqiuo cose wenohrinapū ijiaja. Sa yena Cohācjūre siniihna. ²³“Mūsare yuhduoutja”, tiqiuo nidiro sahata yerota. Sa yena marine tiqiuo yuhduoatōre quehnoano masiaja mari. Tire masina, ne boeracūhna. Cohācjūre sa wacū tutuaducuhna. Sa wacū tutuana tire apequinare yahuaja. ²⁴Mari mehna cjēnare cahīna, tiquinare yedohouhna mari, ijiphtina mari ihcāno saha mari cahme cahī yedohoato saha. ²⁵Sa yena quehnoano cahmecoaducuhna Cohācjū yere yena tana. Apequina pehe tiquina cahmecoamedirore duhuye nine. Tiquina yero saha yeracūhna. Mari mehna cjēnare bucuegū yeihna. Ahri yehpapure mari pūhtoro ahtato mehenogā dūhsare. Tire masina tutuaro bucuegū yeihna mari mehna cjēnare Jesu yequinare.

²⁶Poto ijiye buheyere quehnoañe buheyere mari masiepenata ñañene mari pari turi sa yeducugū mari ñañene cose we nemoato ne mariedare. ²⁷Sa yero sa yeyequinare cuarīne. Ijiphtiyequina tiquirore ihña tuhtiyequinare buhiri dahrero, tutuaro ujnopū cohānota Cohācjū tiquinare. Sa ye tiqiuo buhiri dahreatire cueyequina dihita ijimene tiquirore duhuyequina. ²⁸Cohācjū dutiye Moiserē tiqiuo cūrire yuhduacayequinare buhiri dahreye, mari acaye judio masa wejēne tiquinare. Ne paja ihñano marieno wejēne tiquinare. Ihtiaro tiquina yahusāgū tuhoro beseriquiro tiquina yuhduacarire masino tiquinare buhiri dahre dutire. Ihtiaro mariedagū pūaro tiquina yahusāgū tiquinare buhiri dahre dutire. Sa dutigū tiquinare wejēne.

²⁹Ti bui cjūno Cohācjū macunore ihña yabiyequina tiqiuo buhiri dahreatiquina ijietā. Cristo dii cohāri mehna mari ñaňe yerire cohāre Cohācjū. Sa cohātoře yahuahye tiqiuo marine. Sa yeye tiquina ñaňe yerire cohānohriquina ijiepetā pari turi ñañene yeye, tiquina ñaňe yerire tiqiuo cohārire tiqiuo dii gūhure “Ihyo waro ijire”, niňe nieta. Sa niňequina tiqiuo buhiri dahreatiquina waro ijiye nieta. Sa niňequina Espiritu Santore ñano ni yahuducuyequina ijire. Tiquiro tiquinare cahīniquiro ijire. Tiquina sa ñano yahuducugū ihñano tutuaro buhiri dahrerota Cohācjū tiquinare. ³⁰Ahrire mari quehnoano masiaja. Cohācjū tiqiuo basita ohō saha niahye: “Yuhū ijiaja buhiri dahreacjū. Tiquina ñañene yeri buhiri buhiri dahreitja yuhū”, niahye tiqiuo. Ohō saha ni nemoahye: “Yeequina ijimediquinare ñano yeyequinare buhiri dahreitja yuhū”, niahye tiqiuo. ³¹Cohācjū catiriquiro marine tiqiuo buhiri dahregū cua yuhduare.

³²Panopū mūsa ijirire wacūña mūsa. Ti pjere Cohācjū yere coā masi dūcana peye tahari ñano yuhduēpenata tiqiuo yere cohāedari mūsa. ³³Ihquē tahari masa tiquina ihñonopū apequina mūsare ñano ni, ñano yeperi mūsare. Sa yena apequina Jesu yequinare tiquina ñano yegū ihñana,

tiquinare paja ihñari mûsa. ³⁴Peresupũ ijyiequinare paja ihñari mûsa. Sa yena mûsa yere tiquina ehmaepẽgũta bucueye mehna, “Quehnoanota”, nidi mûsa. Ahri yehpa cjẽ yũhdũoro quehnoañene cũore mûsa umũserũ. Ti quehnoañe sa ijiducueta. Tire masina, mûsa cũoyere tiquina ehmagũ bũjũa wítierare mûsa. ³⁵Sa yena cueracãhña. Cohãcjũre sa wacũ tutuaducuya. Mûsa sa yeri wapa tiquiro quehnoano yerota mûsare. ³⁶Cohãcjũ “Mûsare ohõ saha yedohoutja”, tiquiro ni cũrire quehnoano cohteya mûsa tiquirore wacũ duhuro marieno. Sa cohtena tiquiro cahmeñene yenata mûsa. Sa yena tiquiro ni cũrire cũonata. ³⁷Ohõ saha nine Cohãcjũ yere tiquina ojoari pũpũ: Mehenogã dũhsare Cristo wihato. Sa ahtaro duita wihi madoqueorota. ³⁸Yeequina quehnoañequina pehe yũhũre wacũ tutuaducueta. Sa ye yeequina yũhũ mehna sa ijiducueta. Yeere cohãñequina pehere ihña yabíaja yũhũ, niahye tiquiro ye yahuducuye tiquina ojoari pũpũ. ³⁹Mari pehe Cohãcjũ yere cohãrina ijieraja mari. Sa yena pecapũ wahatina ijieraja mari. Cohãcjũre wacũ tutuaja mari. Sa yena tiquiro yũhdũorina íjijaja.

Wacũ tutuayere yahuahye

11 ¹Ohõ saha íjire wacũ tutuaye: Cohãcjũre wacũ tutuana, marine tiquiro quehnoano yeatire quehnoano masíaja mari. Cohãcjũ tiquiro nídiri sahata yeraniepẽgũta tiquiro yahuyere “Íjirota íjire”, ni tũhotuaja mari tiquirore wacũ tutuana. Tiquirore ihñedapenata, wacũ tutuana, “Íjirota íjire”, ni tũhotuaja mari tiquiro yahuyere tũhona. ²Panopũ cjẽna Cohãcjũre tiquina wacũ tutuagũ ihñano bucueahye tiquiro pehe. ³Cohãcjũ tiquiro yahuducuye mehna íjipihtiyere bajumehnee tiahye. Sa yero tiquiro mari ihñedari mehna íjipihtiyere mari yojopũ ihñañene bajumehnee tiahye. Tire mari quehnoano masíaja Cohãcjũre wacũ tutuana pũrita. ⁴Cohãcjũre wacũ tutuaro Abe pehe corderore wejẽ, ɰjũa mũo, Cohãcjũre ño peo “Quehnoare”, niahye. Tiquiro wahmino Caí yũhdũoro quehnoanore ohoro, ño peoahye tiquiro Cohãcjũre. Sa yero Cohãcjũ tiquiro ohorire bucueahye. Sa bucuerdo “Quehnoariquiro íjire”, ni ihñahye tiquiro Abere. Sa Cohãcjũre tiquiro wacũ tutuagũ ihñana mari tiquirore ihña cũaja. Sa yena tiquiro yariari bato íjiepẽgũta tiquiro wacũ tutuarire ihña cũaja mari. ⁵Enoco Cohãcjũre tiquiro wacũ tutuagũ ihñano bucueahye Cohãcjũ. Sa bucuerdo tiquirore tiquiro cahapũ ne mũoahye. Sata nine Cohãcjũ yere tiquina ojoari pũpũ. Tiquiro ne mũori bato masa tiquirore ne bocaerahye. Tiquiro ne mũonohriquiro íjiro ne yarierahye. ⁶Cohãcjũre wacũ tutuerana tiquirore bucuegũ ye masiedaja mari. Cohãcjũre wacũ tutuerana, tiquirore ño peo masiedaja mari. “Potota tiquiro Cohãcjũ warota íjire. Sa yero tiquirore mari ño peogũ marine quehnoano yere tiquiro”, mari ni tũhotuerana mari tiquirore sini masiedaja. ⁷Noé Cohãcjũre wacũ tutuaro, tiquirore Cohãcjũ yahurire quehnoano yũhtiahye. Camerũ tiquina ñano wahatore tiquiro yahugũ tũhoro quehnoano yũhtiahye tiquiro. Sa yũhtiro, pajiria yucusare yeahye. Sa yeye

wejëboriquiro ijiro yaria masariquiro yero saha ijiahye Isaac, Abrahã ihñagũ. Sa yero Abrahã tiquirore catiriquirore pari turi cõoahye.

²⁰Isaac Cohãcjũre wacũ tutuaro, tiquiro pohnene Jacore, Esaú gũhũre “Camepũ Cohãcjũ mũsare pajiro quehnoano yerota”, niahye.

²¹Cohãcjũre wacũ tutuaro Jacob tiquiro yariato panogã José pohnene, umũare “Cohãcjũ mũsare pajiro quehnoano yerota”, niahye Jacob. Dũsepe curi mehna quehe sa, tiquiro tuadu mehna tua ñehe cuña, Cohãcjũre ño peoro “Cohãcjũ mũsare quehnoano yerota”, ni cũahye.

²²Cohãcjũre wacũ tutuaro José tiquiro yariato panogã Israe masa Egiptopũ ijieyquina tiquina wijiatiye yahuyuahye. Sa tiquina wijiatiye masiyuro tiquiro yariari bato tiquiro pagũre nea dutiahye tiquiro pohnene.

²³Cohãcjũre wacũ tutuaye, Moisegãre ihtia asũ waro nũo cõoahye tiquiro pacũsumũa, tiquiro masa bajuari bato. Quehnoariquirogã tiquiro ijigũ ihñãñe tiquirogãre nũoahye. Ti yehpa cjẽna pũhtoro tiquina pohnene tiquiro wejẽ dutirore yũhdũdũca cãhye tiquina. Tiquirore cuerahye.

²⁴Moisere masoricoro Egipto yehpa cjẽna pũhtoro macono ijiahye. Sa ticoro masonohriquiro ijiro, Cohãcjũre wacũ tutuaro “Ticoro macũno ijire”, ni pisugũ cahmedahye Moise. ²⁵Cohãcjũre yũhdũdũcariquiro ijiro tiquirore masoricoro cahapũ meheñe decorigã quehnoano ijiboya. Sa ijiboriquiro ijieperota ti yũhdũoro tiquiro Cohãcjũ yequina mehna ñano yũhdũ duahye. ²⁶Sa ñano yũhdũoro Cristore tiquina bũjũpeato sahata tiquina bũjũperiquiro ijiahye. Camepũ tiquiro quehnoano yeri wapa Cohãcjũ tiquirore tiquiro quehnoano yeatiye masino ñano yũhdũ duahye, Cristo tiquiro ñano yũhdũato sahata. Ijipilthieyquina Egipto cjẽna quehnoañene tiquina cũoro yũhdũoro tiquiro Cohãcjũ pehere tutuaro cahmeahye. Ñano yũhdũeperota, Cohãcjũre cahmeahye.

²⁷Cohãcjũre wacũ tutuaro, Egipto cjẽna pũhtoro tiquiro mehna usuagũ cuerahye. Sa cueraro ti yehpapũ ijiriquiro ti yehpare cohã cãa wahahye. Sa yero Cohãcjũre bajueriquirore tiquiro ihñaboriro saha cuerariquiro ijiahye. Cohãcjũ tiquirore ye dutirire ne cohãedahye Moise. ²⁸Cohãcjũre wacũ tutuaro Moise Israe masare Cohãcjũ yũhdũoatiye masiahye. Sa masino Cohãcjũ dutiriro sahata Israe masa tiquina sopecaharire ohõñe pjĩnine dii mehna wejẽ site dutiahye tiquiro. Tiquina sa yegũ ihñano angel masare wejẽdiquiro tiquina wahmisũmũare wejëboriquiro Israe masa pohne wahmisũmũare wejẽdahye.

²⁹Cohãcjũre wacũ tutuaye, Israe masa “Sohãri ma”, tiquina nidi mapũ aco watoa ijiri mahapũ aco marieni mahapũ pehãa wahahye. Tiquina sa pehãgũ ihñãñe Egipto cjẽna gũhũ tiquinare ihña cũ, nũnũ tã pehãmehe, mini yariaa wahahye.

³⁰Cohãcjũre wacũ tutuaye, Israe masa Jericó wame tiri maca cjã sahrĩno pajiri sahrĩno behero pehe majare sotoahye. Siete decori waro ti macare majare sotoa tiniahye. Tope decori tiquina majare sotoa tinidi bato ti sahrĩno sehte bora dijia pihtia wahahye. ³¹Cohãcjũre wacũ tutuaro umũa mehna ñano yeducumedicoro Rahab wame tiricoro, ti maca cjõno Israe

masare yedohoahye. Ti macare tiquina cohãto pano meheñequinagã Israe masa topu sajã tiquina duhti ihñagũ, ticoro tiquinare yedohoahye. Ticoro sa yedohogũ ihñañe Israe masa wejẽdahye ticorore. Sa yeye ti maca cjẽnare Cohãcjũre yũhdũdcayequinare wejẽpeta ticoro pehere wejẽdahye.

³²Apequinare Cohãcjũre wacũ tutuayequinare yahu nemoboa yũhu. Sa yahu duepegũta peyequinare sa Cohãcjũre wacũ tutuayequinare yahu ojoa peho masiedaga yũhu. Peyequina ijire tiquina. Gedeõ, Barac, Sansõ, Jefté, Davi, Samuel, Cohãcjũ yere yahu mũhtariquina gũhu ahriquina ijipiltiyequina yũhu yahuboriquina ijire. ³³Cohãcjũre wacũ tutuayequina ihquẽquina apeye yehparipu ijie macari cjẽnare cahme wejẽ yũhdũdcahye. Sa yeye apequina quehnoano dutiyequina ijiahye. Cohãcjũ tiquinare “Mũsare yedohoutja”, tiquiuro nidiro sahata tiquinare yedohoahye. Tiquiurore tiquina wacũ tutuagũ ihñano sa tiquinare yedohoahye. Sa wacũ tutuaye, yayia tiquinare ihya duagũ tiquina dũserire bihagũ yeahye tiquina. ³⁴Tutuario mũjũri pecapu ijiepetã mũjẽdahye tiquina Cohãcjũre wacũ tutuaye. Apequina tiquinare ñose wejẽ duagũ duhti cãa wahahye Cohãcjũre wacũ tutuaye. Tutueyequina ijiepetã Cohãcjũre wacũ tutuaye tutuayequina wahahye. Cohãcjũre wacũ tutuayequina ijie, cahme wejẽñe tutuayequina ijiahye. Sa ye apeye yehpari cjẽna surara tiquinare wejẽñe ahtayequina ne ihcãno sahaerahye tiquinare. ³⁵Ihquẽquina numia Cohãcjũre wacũ tutuagũ ihñano tiquina acaye yariagũ ihñano Cohãcjũ pehe tiquinare maso basahye.

Apequina “Cohãcjũre cahmedacãhña”, tiquina ni peresu yenohriquina ijiepetã Cohãcjũre duhu duerahye. “Cohãcjũre mũsa duhugũ mũsare wionata”, nimahye tiquinare peresupu yenohriquina Cohãcjũ yequinare. Tiquina sa niepegũta tiquinare yũhtierahye, Cohãcjũ cahapu tutuario waha duaye. Sa yeye tiquinare ña yũhdũaro tiquina yepegũ yariaa wahahye. ³⁶Apequinare Cohãcjũre wacũ tutuayequinare ñano ni mũjũpe tiquinare tana mũjãe tiahye. Sa yeye apequinare dahpocãrine, omocarine duhte cãa, peresu yeahye. ³⁷Cohãcjũre wacũ tutuayequinare ñañequina utã mehna doque wejẽahye. Apequinare tiquina pagũrre seroti mehna yũhre sure mũjahye. Apequinare ñoseñe pjĩni mehna ñose wejẽahye tiquina. Sa yeye tiquina sa ñano yepenohñequina oveja cahseri mehna, cabra cahseri mehna suhti tiyequina pejecũoyequina ijiahye. Sa ye apequina tiquinare ñano yepeahye. ³⁸Tiquina quehnoa yũhdũayequina ijigũ ahri yehpa cjẽna ñañequina tiquina mehna ijiboriquina ijierare. Ahriquina Cohãcjũre wacũ tutuayequina wũhũse marieñequina ijie, masa marienopu, cũnu cjuũpũ iji soto tae tiahye. Sa iji soto tae, cũnuũpũ ijie coperipu, yehparũ ijie coperipu gũhũre carĩ soto tae tiahye.

³⁹Ahriquina ijipiltiyequina Cohãcjũre tiquina wacũ tutuagũ ihñano bucueahye tiquiuro. Tiquina sa wacũ tutuepegũta Cohãcjũ tiquinare “Mũsare yũhdũoutja”, tiquiuro nidiro eseraniahye. ⁴⁰Tiquiuro yũhdũoerãnidire yahuro ohõ saha ni tũhotuahye Cohãcjũ. “Ahriquina yeequina camepũre ijiatiquina mehna ihcãno saha ihcã curuapũta yũhdũoutja”, ni tũhotuahye. Sa ni tũhoturo tiquiuro nidiro sahata yerota. Tiquiuro sa yegũ quehnoa yũhdũare panopũ tiquiuro yeriro yũhdũoro.

Jesure sa wacūducuuhna mari

12 ¹Sa yena ahriquina yūhū yahuriquinare peyequina Cohācjūre wacū tutuayequinare ñañene yeeyequinare masina, ijipihtiye ñañe yeyere duhu cāuhna mari gūhū. Ohō saha ijire mari queoye mehna buhegū: Omaperiquirote oma tutuagū cahmotaye ijire apeye. Tiquiro dahpo suhti nācūñe suhti tiquirote oma tutueragū yeboaga. Ti yero saha Cohācjū cahmeñene mari ye duagū cahmotaye gūhū ijire. Ti gūhūre duhuuhna mari. Sa yena omapeyequina tiquina oma tutuaro saha mari gūhū tutuaro Cohācjū cahmeno saha yeihna. ²Sa yena Jesure sa wacūducuuhna mari. Tiquirota ijire marine wacū tutua dācagū yeriqiro. Sa yero marine wacū tutua nemogū gūhūre yere tiquiro. Curusapū yariaro wacū tutuahye. Came tiquiro bucueatore masino curusapū yariahye. Sa yariaro bue tiboriquiro ijeperota bue tierahye tiquiro. Sa yero yojopūre Cohācjū tiquiro pūhtoro dujiro poto pehe dujitjāno tiquiro dutiriquiro ijire.

³Ñañequina masa tiquirote tiquina ña yūhdūaro yegū ihcāno sahahe tiquiro. Tire wacūña mūsa, mūsa gūhū ñano yūhdūna, “Ihcāno sahaerabo”, nina. Tire wacūña mūsa “Tiquirote wacū tutua duhuari”, nina. ⁴Ñano yūhdūepenata ñañene yerare mūsa. Sa ñano yūhdūepenata ña yūhdūaro waro yūhdūeraniaga mūsa. Ñañequina mū sare wejēdarīaga. ⁵¿Cohācjū mū sare tiquiro pohñare tiquiro yahurire bo cjāri mūsa? Mūsa ñano yūhdūatire tiquiro yahurire wacūña mūsa. Ohō saha niahye tiquiro:

Yūhū macū, mūhūre yūhū yahugū usueracāhña ñano yūhdūepēgūta.

Mūhūre yūhū tuhtigū tūhogū bujūa witieracāhña. ⁶Ijipihtiyequina yūhū cahñequinare yahuaja. Sa yegū ijipihtiyequina “Yūhū pohña ijire mūsa”, yūhū ni ihñañequinare yūhdūdūca dutieraja. Sa yegū tiquina yūhdūdūcagū ihñagū tiquinare buhiri dahreaja, niahye Cohācjū.

⁷Ñano yūhdūna Cohācjū yere duhuercāhña. Cohācjū mū sare tiquiro pohñare buhiri dahrero nine. Tiquina pacūsumūa tiquina pohñene sa yahuducure. Sa yeye tiquinare buhiri dahreducure. Sata yere Cohācjū gūhū marine tiquiro pohñare.

⁸Ijipihtiyequina tiquiro pohñene yahure Cohācjū. Cohācjū mū sare yahueragū tiquiro pohña waro ijierare mūsa. Pacūsumūa marieñequina yero saha ijire mūsa tiquiro yahumehñena ijina. Sa ijina “Usā pacū waro ijire”, ni masiedare mūsa Cohācjūre, mū sare tiquiro yahueragū. ⁹Mari pacūsumūa marine tiquina yahugū tūhona tiquinare ño peoaja mari. Mari pacūsumūare mari ño peoro yūhdūoro ño peoro cahmene mari Pacūre Cohācjūre tiquiro yahugū. Sa yena tiquirote yūhtiro cahmene marine. Sa yūhtina ijina ijipihtiye decori tiquiro mehna ijinata.

¹⁰Meheñe decorigā ahri yehpapū mari ijinigū mari pacūsumūa marine yahuye, buhiri dahrere. Tiquina esa tuharo tiquina masino punota marine yahuye, buhiri dahrere. Cohācjū pehe marine quehnoano yahure. Sa yero tiquiro masiñe mehna marine buhiri dahrere, marine quehnoana bucūa dutiro. Sata yere marine tiquiro yero saha quehnoana marine iji dutiro. ¹¹Marine tiquiro buhiri dahregū bucueraja

mari. Mari ihyo bujua witiája. Sa bujua witiepenata tiqairo sa buhiri dahreri bato quehnoana wahanata mari. Sa yena ñañene yero marieno quehnoano ijinata.

Cohãcjũ marine tiqairo dutiyere mari yũhtieragũ cuarĩne marine

¹²Sa yena wacũ tutuera cjũna ijiepenata Cohãcjũre wacũ tutuana ijia. Tiquirore duhueracãhña. ¹³Quehnoano potori mahare mũa waharo saha quehnoano poto yeya mũa. Mũa sa yegũ ihña cũne apequina Jesu yequina ñañene yesi. Mũa quehnoano yegũ ihña cũne quehnoano wacũ tutuera cjũnequina gũhu wacũ tutuayequina wahaeta.

¹⁴Ijipihtiyequina masa mehna quehnoano ijia, cahmequeno marieno. Sa yena ñano yeracãhña. Ñañe mariñequina dihita mari pũhoro Cristore ihñaeta. ¹⁵Quehnoano yeya mũa. Cohãcjũ mũsare tiqairo yedohogũ quehnoano yũhtiya. Ñañe taa diaye tiquina oteyere ti dojomehneneno saha mũa gũhu Cristo yere duhueracãhña, “Apequinare dojomehnenari”, nina. ¹⁶Ne wũana tieracãhña. Sa yena Cohãcjũ yere cahmeena ijieracãhña. Cohãcjũre cahmeediquiro ijiahye Esaú. Tiquiro wahmino ijimahye. Sa yero tiqairo pacũro yariari bato tiqairo pacũro yere cũoatiquiro ijimahye. Cohãcjũ tiqairo pacũrore tiqairo ni cũri gũhũre cũoatiquiro ijimahye. Sa yero ihcã deco ihcã pa ihyaye pose tiri pare cahmeno, ti pa mehna tiqairo bahũro pehere tiqairo wahmino wahagũ yero taro comesahye. ¹⁷Tiquiro sa yeri bato tiqairo dũhse waharire masine mũa. Tiquiro pacũro tiqairore ohoatire tutuaro cahmemahye Esaú. Tiquiro sa cahmepegũta tiqairo bahũrore wahmino wahagũ yeri buhiri, came tiqairo cũoborire ohoerahye tiqairo pacũro. Tire utiye mehna tiqairo siniepegũta tiqairore ohoerahye.

¹⁸Cohãcjũ dutiyere Moiserre tiqairo cũgũ mari acaye Israe masa mũa Cohãcjũ mehna ijie tiahye. Tiquina tiqairo mehna ijiriro saha mũa pehe ijierare. Ohõ saha yeahye tiquina pehe. Cũnũpũ Cohãcjũ mehna ijie taye, esahye. Ti cũnũ pehe Sinaí wame tidũ ijiahye. Ti cũnũre dahra tuhu masiahye masa. Ti cũnũpũ tiquina esagũ tutuaro peca ujuahye. Sa yero nahitiano, bueri, tutuaro wihnono mehna ijiahye ti cũnũpũre. ¹⁹⁻²⁰Ti cũnũpũ tiquina esagũ corneta bisiro ca tahye. Sa yero yahuducuye bisiro ca tahye. Ti sa yahuducuye bisigũ tuhoye, masa ihcãno sahaerahye. Cohãcjũ cuaro mehna ohõ saha ni, dutiahye tiquinare: “Ijipihtiyequina ahdũ cũnũre dahra tuhuyequinare utã mehna doque wejẽna tiquinare. Ahdũre dahra tuhuriquiro wahiquiro waro tiqairo ijiepegũta tiqairo gũhũre utã mehna doque wejẽna tiqairore. O ñosenũ mehna ñose wejẽna tiqairore”, niahye Cohãcjũ. Tiquiro sa nigũ tuhoye ihcãno sahaerahye tiquina. ²¹Sa yero ijipihtiye tũ cũnũpũ ijiro tiqairo ihñarire ihña cuero, ohõ saha niahye Moise: “Cuegũ nanaregũ niaja”, niahye tiqairo.

²²Sa Cohãcjũ mehna tiquina iji dũcariro sahata ijierare mũa pehe. Cohãcjũ mehna ijina wahana, Siõ wame tidũpũ uhmũse cjãdũpũ mũa esaboro saha potota Cohãcjũ mehna yahuducure mũa. Cohãcjũ catiriquiro ya macapũ mũa esaboro saha potota tiqairo mehna yahuducure mũa. Ti maca ape maca wahma maca Jerusalẽ uhmũse cjã maca ijire. Topũre peyequina angele pari ijire.

23 Tiquina Cohãcjũ mehna bucueye tehe cahmecoañequina ijire. Sa yena mûsa pehe tiquiro ya maca cjãna ijina, topu Cohãcjũ pohne jji muhtañequina mehna mûsa cahmecoaboriro saha ijire. Tiquina tiquiro pohne wamene tiquiro ojoa ohõri tjupe umusepe tiquina wamene tiquiro ojoa ohõnohriquina ijire tiquiro pohne. Tiquiro pehe mari Pacu pehe jipihtiyequinare beseatiqiro ijire. Tiquiro mehna cjãna ijire mûsa pehe. Sa yena tiquina quehnoañequina Cohãcjũ yequina mehna cahmecoano saha ijire mûsa gũh. Tiquinare jji muhtariquinare ñañe marieñequina ye tuhasahye Cohãcjũ. 24 Sa yena Jesu mehna cjãna ijire mûsa pehe. Wahmanopu Moiseru tiquiro duti cûrire comesaro “Mûsare yuhduoutja yuh”, ni cûahye Cohãcjũ marine. Tiquiro sa ni cûriro sahata yeriquiro ijire Jesu. Tiquiro diire cohã, tiquiro yariari mehna marine sa yuhduore. Abe manano tiquiro dii cohãgũ ihñano Cohãcjũ Abere wejediquire buhiri dahreahye. Jesu pehe tiquiro diire cohãgũ, tiquiro yariari mehna quehnoano yuhduaja mari. Sa yero Abe tiquiro dii cohãri ihyo warota ijahye. Cristo pehe tiquiro dii cohãri bato quehnoa yuhduaro yeahye Cohãcjũ marine. Sa ye tiquiro dii cohãri ihyo warota ijierare.

25 Sa yena quehnoano yeya mûsa. Cohãcjũ yere mûsare yahuriquire quehnoano yuhina ijia. Panopu ahri yehpau ijiriquiro Moise Cohãcjũ yere tiquiro yahugũ tuhoye, peyequina tire tuho duerahye. Sa tiquina tuhoerari buhiri buhiri dahreahye Cohãcjũ tiquinare. Tiquina yuhduoro buhiri dahrerota Cristore cohãñequinare. Cristo pehe umusepe ijiriquiro Cohãcjũ yere yahuriquire ijire. 26 Ti pjere Moiseru tiquiro dutiyere cûri pjere Cohãcjũ tiquiro yahuducuro mehna yehpa ñuhmigũ yeahye. Yojopu pehere ohõ saha ni yahuahye tiquiro: “Ihcã tahata ahri yehpa ñuhmigũ ye nemoutja. Ahri yehpa dihitare ñuhmigũ yesi yuh. Umusepe gũhure ñuhmigũ yeitja”, ni yahuahye tiquiro. 27 “Ahri yehpa ñuhmigũ ihcã tahata ye nemoutja”, nino, jipihtiyere tiquiro bajumehnedire tiquiro cohãtore masigũ yero niahye. Cohãcjũ puhtoro ijirupe cohãno basioerare. Sa yero tiquiro bajumehnedire cohãgũ tiquiro puhtoro ijiro dihita tojoarota. 28 Tiquiro puhtoro ijirupe wahanata mari. Sa yena tiquiro puhtoro ijirure tiquiro cohãdagũ ihñana, Cohãcjũre “Quehnoare”, niñna mari. Sa yena tiquiro ño peoye mehna, cua pesaro mehna tiquiro yere yeihna mari tiquiro bucuegũ yena tana. 29 Peca ujũno cuaro saha Cohãcjũ gũh cuaro mehna buhiri dahreriquiro ijire.

Ohõ saha Cohãcjũre bucuegũ yeya

13 1 Mûsa mehna cjẽnare cahĩ duhueracãhña. 2 Masa mûsa ihña masieñequina tiquina ijiepegũta tiquinare mûsa wuhusepe quehnoano mehna sajã ta dutiya. Apequina sa yeye, masiedapeta angelere tiquina ye wuhusepe sajã ta dutiahye. Sa yena tiquina yero saha yeya mûsa gũh.

3 Peresupe ijiequinare paja ihñaña. Mûsa pehe tiquina mehna peresupe ijina mûsa ijiboro saha tiquinare paja ihñaña. Apequina tiquina ñano yenohriquina gũhure paja ihñaña. Tiquina yero saha mûsa gũh ñano yuhduoro saha tiquinare paja ihñaña.

⁴Omoca dũhterina ijipihtina mũsa basi quehnoano cahme ño peoya. Sa yena apequina mehna ñano yeracãhña. Ijipihtiyequina numia mehna ñano yeyequinare, ı̄mũa mehna ñano yeye numia gũhũre buhiri dahrerota Cohãcjũ.

⁵Niñerure ne cahiedacãhña. Ohõ saha niahye Cohãcjũ: “Mũsare ne cohãsi yũhũ. Mũsare sa yedohoducugũtja”, niahye tiquiro. Sa yena noho puno mũsa cũoye mehna to punota bucueya. Pajiro cahme nemoedacãhña. ⁶Sa yena cuero marieno ohõ saha ni tuhotunata mari:

Mari puhtoro Cohãcjũ marine yedohoriquiro ijire. Ne cuesi mari.

Masa marine tiquina ñano yeatire cuesi mari, ni tuhotunata.

⁷Cohãcjũ yere mũsare yahuriquinare mũsare dutiriquinare wacũña mũsa. Sa yena quehnoano tiquina ijie tirire quehnoano tiquina yee tirire wacũña. Sa wacũna, Cristore tiquina wacũ tutuariro saha yeya mũsa gũhũ.

⁸Jesucristo ne comesaerare. Panopũ, yojopũ gũhũre, camepũ gũhũre tiquiro ijiriro sahata iiducurota tiquiro. ⁹Peye buheyere sijoro saha ijie buheyere tuhoeracãhña mũsa “Quehnoañe buheyere usãpũ cohãri”, nina. “Ahrire ihyaya. Ahrire ihyeracãhña”, ni buhere ihquẽquina. Sa tiquina ni buheyere mari yũhtigũ ti marine yedohoerare. Sa yero sa ijie buheyere mari yegũ ihyo warota ijire. Ti marine wacũ tutuana ijigũ yerare. Cohãcjũ pehe marine wacũ tutuana ijigũ yere. Sa yena tiquiro ye tutuaye mehna tiquirore wacũ tutuana ijia mũsa gũhũ.

¹⁰Cristo mari ñañe buhirire yariahye mari ñañene cohãno taro. Pahia pehe ohõ saha niñequina ijire: “Wahiquina mari wejẽ ı̄jũa mũo, mari ohoyequina mehna yũhdũnata”, niñequina ijire pahia. Sa niñequina tiquina ñañe yerire cohãnohriquina iji masiedare. ¹¹Mari judio masa mari pahia puhtoro Cohãcjũ ijiri tucũ waropũ diire ne sajãno wejẽ siteahye, masa tiquina ñañe yerire cose wero taro. Sa yero tiquiro wejẽdiquiro wahiquiro pagũre ti maca dũhtũ cahapũ ı̄jũa cohã cãre. ¹²Tiquiro yeriro saha Jesu gũhũ maca dũhtũ cahapũ yariahye, masa tiquina ñañene tiquiro dii cohãno mehna cose wero taro. ¹³Maca dũhtũ cahapũ tiquiro yariagũ ihñañe, tiquina ye buheyere tiquiro cohãgũ ihñañe judio masa puhtoa tiquirore ihña tuhtiahye. Sa yena mari gũhũ tiquiro mehna cjãna ijihna. Mari sa ijigũ ihñañe, masa mari gũhũre ihña tuhtietia. ¹⁴Ahri yehpapũ mari iji dojoati maca ne mariedare. Mari camepũ ijiaati macare cohtena niaja mari. ¹⁵Sa yena Jesu yedohoro mehna mari Pacũ mehna yahuducuaaja mari. Sa yena tiquirore quehnoano siniihna. “Mũhũ usã Pacũ quehnoagu, tutuagu ijire”, ni, ño peoducuuhna. “Jesu yequina ijiaja”, ni, sa niña mari Pacũre. Mari sa nigũ tiquiro bucuero. ¹⁶Mũsa mehna cjẽnare quehnoano yeya. Sa yena tiquinare yedohoya. Tire boeracãhña. Mũsa sa quehnoano yena Cohãcjũre ño peona niaga mũsa. Sa yena tiquirore bucuegũ yena niaga.

¹⁷Mũsa puhtoare quehnoano yũhtiya. Tiquina dutiro sahata yeya. Cohãcjũ ihña ihbo, buhe dutiro cũre mũsare tiquinare. Sa cũnohriquina ijie mũsare sa ihña ihboducuye nine “Cohãcjũre yũhdũdũcari”, niñe. Camepũ mũsare tiquina dutirire, tiquina yerire Cohãcjũre yahueta. Sa yena tiquinare quehnoano yũhtiya

musa. Musa sa yuhtigũ ihñañe bucueye mehna musare yedohoeta tiquina. Musa yuhtieragũ ihñañe tiquina bujua witieta. Sa yuhtierana quehnoano ijisi musa.

¹⁸Usãre sini basaducuya Cohãcjũre. Decoripe quehnoañe dihitaré yé duaja usã. Sa yena “Ñañene yena nijaja”, ni tuhouteraja usã. ¹⁹Ahri pũritare tutuaro sini basaya Cohãcjũre yuhure: Sojaro mehna musa cahapũ yuhũ wahatire tiquiore sini basaya.

Ahri pũre ojoariquiore quehnoa duti bato tiahye

²⁰Cohãcjũ mari pũhtoro Jesure yariariquiore masoahye. Marine quehnoano ijigũ yeriquiore ijire. Tiquiore “Musare yuhduoutja”, ni cũahye Cohãcjũ marine. Tiquiore sa ni cũrre yeriquiore marine yuhduoriquiore Jesu pehe ijire. Mari ñañe buhirre yariahye tiquiore. Sa yero tutuariquiore ovejare ihña ihboriquiore yero saha ijire, marine tiquiore yequinare quehnoano ihña ihbore. ²¹Sa yero Cohãcjũ tiquiore masoriquiore musa gũhure yedohoahro ijipihtiye quehnoañene tiquiore cahmeñene musa yeatire. Sa yero Jesucristo yedohoro mehna Cohãcjũ cahmeno saha ijipihtinare marine quehnoañe pehere comesagũ yeahro. Sa yena ijipihtiye decori Cristore ño peouhna. Sata yeihna.

²²Yuhũ acaye, ahrire tutuaro musare dutiitja: Ahri pũpũ yuhũ yahurire quehnoano mehna tuhoya musa. Ahri musare yuhũ ojoari pũ pajiro ijierare. Sa yena ahrire quehnoano tuhoya. ²³Ahri gũhure musare yahutja: Mari acayũrore Timoteore peresu ijiriquiore wioñohti. Sojaro mehna tiquiore wihigũ musare ihñagũ wahagũ tiquiore neagutja. Yuhũ mehna waharota.

²⁴Musa pũhtoare, ijipihtiyequina apequinare Cohãcjũ yequinare topũ ijieyequinare quehnoa dutiaja. Italia cjẽna Jesu yequina gũhũ musare quehnoa dutire.

²⁵Ijipihtinare musare Cohãcjũ mehna quehnoa dutiaja.